

閩侯林紆著 毛光

14.2.29

京華碧血錄

商務印書館發行

000 01039

舊



序

夫妖幸不熄。必隳政符。翼軫同占。多兆女變。雖老父請飲。徵異于泗上之田。而才人入宮。蘊禍在感業之寺。矯誑甚于魏元。孽眚深乎齊季。位綜禁要。卽土崩魚爛。而勿恤風兆。暴逆乃彎弓。纏弮之幸。逃長顛之使。無聞范叔之言。不驗于是。權綱墜紊。始峻培而亟斂。宰輔昏瞽。乃就瞑而引妖。邊服無幸。謚之時國。屯有浸播之勢。淮弛旣甚。騷携日衆。亡下陽而不懼。惟淫刑之是逞。淺中浮表。謂榮宗足以盡敵。翼虛駕僞奉郭京。賴其降神。赤剝比干之心。碧化萇宏之血。然而萬騎南來。六飛西狩矣。拓御路以過祿山。撤長圍而燕侯景禍異爾。朱羣凶幸脫于河陰。人釋楊釗。鬻割不聞乎蜀道。馬矢平填于饗殿。龍種莫哀乎王孫。或蓬蒿荒扉作俛。儼偷生之計。或珊瑚寶玦聞蒼涼。哭廟之聲。京畿因而鬪變者。二年客兵爲之攝錄者。六國嗚呼。唯當軸多虧風捐政之人。故江表有歸暖避寒之舉矣。邴生者南州秀少。東越淳人有顧著作之鮮榮。兼房景伯之通贍。得劍歐冶求師少林。方欲徧歷名勝。周量世局。超山五里。

逐步梅花漳湖九道彌望葭莩腰輿出沒收竹色以染衣僧房孤危抱鐘聲而入夢
然初念特在尋山奇緣無關訪美也一自宓姬見神于洛浦雲英驚艷于藍橋物外
見其貞嫻女中寡此韶淑用不疑還金之義遂叔鸞相婿之謀時則劉翁方坐曹于
秋官邴生將讀書於國子倉卒值天寶之變乘輿有奉天之行據勢不惟宦官召戎
乃出王子灑尸暴雨宿血濺爲紅泥毗屋凝塵壞墻浸彼苦月然而美人遇亂非挾
小忽雷而行俠客解圍竟獲大鐵椎之助實則伯弼威名咸知時有秦士韋郎武技
先已試之汝州矣時則灌穴發牆方且拚求魁蠹埋戈爨盾無復嘯引凶愚宗臣來
取節之人翰苑備迎鑾之賦生乃一帆烟月直指杭州滿地江湖掉頭魏闕產資桑
柘門深薜蘿塔影遮樓網軒礙月花片入戶粉盞增香注雞碑雀錄以怡情仰蛤港
螺田而供饌豈惟栖隱亦曰達生嗟夫桃花描扇云亭自寫風懷桂林隕霜藏園兼
貽史料作者之意其在斯乎雖然閻浮世界固有種民而摩詰因緣但歸法喜終以
荼毗一炬脫衆生于三劫之輪從茲面壁十年求樣本作無縫之塔王子長至畏廬

居士敘

857943
877-34
13

京華碧血錄

畏廬戲編

第一章

一日爲九月之中旬。閩中風候尙含殘暑。南門之外。隔三橋。始通藤山。山勢橫亘。江上如屏。估舶千艘。或下自洪山。或自虎門來。爭輳於江南橋之下。檣竿林立。而山上蒼松翠柏。一望純綠。塔級蜿蜒。均西人砌置。重樓邃閣。夾山關爲長衢。白藤之轎。出沒林表。自橋上望之。如展畫圖。沿山徑而下。可及李忠定之松風堂。顧亦爲西人所居。名勝遂失。然斜陽風篠中。尙有一少年徘徊。其下年可二十許。狀貌沈毅。忽忽如有所思。自念忠定之祠。本在西關之桐口。吾曾過一展拜。聞有公手勒二帝賜詔在祠堂壁間。燬於明季。吾殊恨不得其搨本。而藤山故蹟。又爲西人所據。想公生平力排金人。始終不主和議。黃汪因是傾公。公心念二帝北遷。國仇耿耿。不圖身後之祠。

亦爲異族所有。度公毅魄必不安居於此矣。於是怏怏出祠外。邈迤下山。至水次。觀打魚。西日垂匿。江水空明如鏡。老漁施網於澄潭之下。出之無一魚。力擲船上。有聲鏘然。檢視一古劍。乃無跗青熒。作碧色。網日均斷。然網收而力厚。劍鋒雖利。亦爲重裹。而上漁人拾之。創手大恨。以爲不祥。將仍投之潭中。少年力止之。議與購。問價。漁人忽居爲奇貨。堅不售。少年終以二餅金得之。劍身長可三尺五寸。漢尺也。鋒利無比。少年旣得此劍。則裹以素巾。至瀕江小樓中。命酒橫劍於案。獨酌。乃不識劍之所自。因憶名勝志。稱吳越春秋。越王允常聘歐冶子作名劍五枚。允常傳數世。至無疆國滅於楚。乃徙居閩。又數世。至無諸。乃復封王。或冶劍於山。淬劍於池。然歐冶池在將軍山下。此爲龍潭。非池也。何由得劍。又憶三山志。唐元和中。僧惟幹。濬歐冶池。得銅刀劍環數枚。送武庫。然亦未聞得劍。今此劍精良如是。又得之水中。旣無篆刻。不審其名。可惜也。方把玩間。一蒼頭匆匆至。言曰。太夫人命奴子四覓主人。不得。乃小飲於此。少年愕然問故。奴曰。適浙西高鑄龍先生有書至。請主人入都。時小住杭州。

至字疑止字
之訛

數日同赴公車。少年曰：高公書安在？奴子立上其書。書曰：

仲光足下。別來二年，想尊體勝常。太夫人康健逾昔。至慰至慰。足下年逾二十，乃久不得中饋。賢兄雖已娶，足侍太夫人左右。然足下亦當趣圖賢助。久鰥，良非計也。時事日非，執政多昏憤之親貴，日蹙國者何至千里。甲午一敗，兵氣不復，舟師煨燼，北庭鎖鑰盡失。亡國不審，何日鄙意大禍不必挑於東北二鄰，而革命根株實政府日夜自加培植而使之暴長。修伯符兄弟名隸玉牒，心則齊民，恆思調和漢族而憤憤者，力排以爲妖妄。時時以尺楸至言王室，日夕將傾，禍在蕭牆以內。鄙人亦深韙其說，甚思借計偕之名入都一省。伯符兄弟並觀政府之舉動，擬上書御史臺，請其轉奏。不知足下亦有意乎？此間林太守爲君故人，恆言湖山之美，不得仲光詩文爲之點綴，不足生色。鄙人答以桃花扇中侯生之言，謂我輩且看春光也。林公太息不止。臘底孤山梅已花，胎若能犯雪而來，則逾妙。聞超山梅可三十萬本，鄙人去年曾一至焉，較之西溪樊榭祠堂爲尤美。且聞彼間尙有宋梅。

十株不可不加題詠並致西湖醃蟹二器察收臨楮不勝依馳之至同年弟高鑄龍啓

仲光讀已笑曰如此世局邴仲光尙有宦情耶鑄龍招我犯雪看梅興致不淺然茲事當請之老母耳旣罷酒授劍於奴子王楚徐步歸仲光本家於碧霞浦上流水抱門門內修竹百餘竿奇石三五雜植於苔徑之側間以白菊數十株時霜降菊已盡花黃白照眼仲光入門時有四歲童子眉目秀潔呼曰阿叔醉歸矣仲光趨抱親吻不已卽聞簾內有老人聲吻極慈祥和婉呼曰阿光汝又學醉貓矣今日從何人飲耶王楚手中攜得何物熒熒作碧色仲光進握老母之手言曰適飲於江樓王楚手中所攜古劍也母曰吾三孫甫能行苟觸此鋒爲禍非少吾家不習武且今日悉資鎗礮一劍又何爲者汝趣藏之此物至凶猶可畏仲光笑曰老母勿憂此特儲骨董耳寧能殺人語後納之祕櫥以厚楮重裹之時夜膳已陳仲光之兄伯壽未歸於是合家人同飯飯後月上清輝射簾而入母命卷簾菊香撲鼻仲光移小榻就母而坐

述鑄龍來書。母曰高君書。余已啓讀。余少時聞爾外祖言。超山有唐玉潛先生祠。其旁有所謂香海樓。宋梅可十餘株。今高君書中言十株。或且枯其一。二耳。隆寒行且不易。余老矣。不忍若作無謂之游。觀明春北行。余亦聽汝浙產多美婦人。屬高君爲爾媒介。得一賢婦。娛我晚景。亦大佳事。仲光面頰不能答。時長嫂謝氏亦曰。姑言良當。小郎當自爲計。勿拂老人意也。

第二章

邴仲光者。季漢邴原裔也。少孤。兄曰伯壽。名耆。弟曰叔泉。名佑。仲光名蒼。祖母陳。以孝聞於鄉。母氏亦陳。系出故家。有姑嫁薛氏。微有資財。顧陰刻不悅。邴氏仲光年五歲。恆就其外祖母鄭太君宿。太君通書史。以苦節爲三邴所欽。與薛姑同舍。仲光每至外氏。先朝其姑姑。神宇落漠。不相屬。恆以語嘲弄。邴子之貧。仲光年穉。頗聰穎。異於常童。於是恆匿避。不敢涉足。姑氏之闈。姑尤不悅。恆語太君曰。吾外家子弟。非才阿光。年穉。已齷齪。近惡少。吾兒幼。愿防爲沾染。吾意阿光再履。吾闈。牽牽吾愿。子者。

吾將取償于媪。鄭太君聞言，氣如結。轉矜氏、盧夫人，則大怒，以爲世無骨肉相殘，作炎涼之態。至此者，仲光方依太君之膝，目耿耿視太君。太君久乃長喟曰：「吾孫聽之。若姑非爾骨肉乎？汝穉齒，奈何見醜於姑？此恥又安足滌恆人？詔童子必以科名，余則盼爾以讀書敦行。凡小說家言人至無聊，困頓備諸恥辱，一占鰲頭，則百醜盡可洗。看余之望汝，寧復如是？能讀書敦行，雖布素榮也；寡廉鮮恥，卽大魁天下，寧足爲我宅相？汝善識之人，當知恥。若姑之勵汝，汝師也。仲光聞言，大哭。太君轉以爲異，摩撫其頂曰：「阿光適姑，詈汝，汝不之哭，余詔爾立志。汝反以爲悲，何也？」仲光曰：「吾不怨姑氏，防負我至慈至愛之外祖母耳。矜氏亦爲駭然。自是仲光遇姑氏如初，不以爲忤。姑子阿坤與仲光同歲，時遇秋節，坤謂仲光曰：「餓夫，汝奚不寧家，依人爲食，非計也。」仲光不答。奔卽太君泣而求歸。太君及盧夫人咸愕問故。仲光泣不可仰，再三問則曰：「適姑子斥兒爲餓夫，謂寄食母家爲計，良醜。太君太息無言。盧夫人怒曰：「汝食于矜氏，非托鉢於姑氏家也。矜家固貧，然有甥如此，卽爲我子。余視汝未嘗失汝歸。」

良字疑光
字之訛

卽辱我且若母賢聲姁氏視由女兄弟汝奈何外我而自歸仲光泣謝夫人然終不
可奪太君不得已命輿遣歸太夫人聞狀夷然言曰光汝何修得此策勵之言余三
旬九食不就爾姑氏道寒餒者人固有短安能盡如吾意余與若姊日事針黹得錢
百餘以糜奉若祖母及爾幼弟今爾五齡趣赴學苟逃學者吾不汝道矣時同里有
陳先生者以八股名於鄉黨間顧嗜酒醉卽撻仲光百數仲光手心盡腫顧不敢告
母以硯石自磨其掌俾散其熱血且讀且磨童子掌嫩又被重創幾裂其膚握箸弗
良母覺以爲逃學取答于師長則又加以訓詞仲良唯唯不敢自直其枉嗟夫若在
今日共和之世爲人師者寧能行其兇暴如是耶如是五六年仲光長矣顧家貧不
能得書一日啓屋後敗簾得史記半部猝翻得魏基灌夫武安傳讀之大喜曰此等
文章最入人肝脾積月盡讀其書幸所遺者年表及八書而本紀列傳都在私計旣
不得全書卽讀其畸零者亦佳乃日積數錢逮百遂入城購得殘本子集及列史讀
之間及文選韓杜諸詩時年十二讀殘書積二巨櫥然性暴而喜鬪力可摧撲四五

童鄉里小兒皆尊曰子龍。龍有不平事，恆赴愬于子龍。子龍一至，諸忿悉蠲。一日在玉尺山大樹下，教諸兒兵法。子龍曰：無憚強敵，進卽疾撲，可以制勝。傳曰：先人有奪人之心，語次忽見有長髯之叟，二瞳微碧，呼曰：童子，汝年幾矣？子龍起而敬對曰：童子，蒼年十二矣。老父曰：汝以十二之年，幾將成人，奈何與羣兒戲？老夫善相人，汝當以文章武能自名於世，趣歸治學。世且亂，汝非富貴中人，當以著述流布海內矣。仲光懽然謝羣兒，歸自是杜門。劬學年十七，登賢書，然不以此自足也。

第三章

仲光得劍之數月，挾就匠氏製劍柄及室，室成，挾劍至小西湖開化寺，示其友呂翰。翰能劍，顧乃未嘗示人，得劍大駭，以爲千餘年物，製不必盡出於歐冶，然青熒能卷舒，良劍也。卽解衣而舞，寒氣四射，瞬息間但見劍光飄瞥，不復見人。仲光大贊，忽有老僧癡而且喘，停趾門次，稱曰：居士，奏技良佳，吾惜其人不如劍也。呂生舞止，言曰：開士定爲大師，聞言吾已深悉其能，請執業爲開士弟子。仲光亦肅然拱立，癡師喘。

息入座自言爲開封人居嵩山曾事少林妙善師習劍十年初時強人而就劍久乃劍與人合閉目中劍恆旋折身之左右又久則並其身而忘之躍躍然身已成劍矣二生聞之愕然疑爲劍仙則膜拜座下僧不爲動久乃曰人方以鎗礮示武區區仗此何爲不足制敵但成眩人於居士胡益二生請不已僧意微動於是下座二生帶劍從入丈室室乃無劍僧此時始索劍畧一伸縮呂生瞠目覺家數皆非已所有執業之意彌堅僧許可於是仲光乃襆被至寺與呂生同執業於僧僧名履寺中人皆稱曰僧履猶所稱僧耳僧尾者也僧言有同業者曰僧蠲挂錫杭州祖塔院藝高於己一生未嘗以藝授人聞仲光將取道杭州俾往候視於是習劍可四匝月冬盡仲光告歸凡劍術之騰擲擊刺捎撇迎拒一一通曉然不如呂生之精呂固宿能光則新學烏得如也既歸太夫人問所業仲光不敢匿一一舉僧履所能上太夫人太夫人曰汝不讀段成式傳飛飛耶凡僧技寧能傳人此技用自娛樂可也海內多異人倖勿自試而取禍仲光傾首服太夫人言時臘盡微雪室中陳盃梅紅酣醉人伯壽

亦自外歸。伯壽爲邑名諸生。恆得美館。以館穀贍家。仲光賣文。得巨公潤筆。歲且千金。用此家少康。兄弟旣聚。大歡。惟季弟叔泉久病肺。太夫人頗用此爲憂。二兄顧恤。至暱。叔泉亦樂而忘其病。日就窗下研墨習書。又作簡筆蘭竹。顧不如仲光能寫大。屏巨障山水也。伯壽歸時。購得秦吉了。能人言。伯壽以輕綃作囊囊香藥。挂之籠上。吉了冠觸藥囊。云足治蟲。太夫人臨窗恆與吉了言。吉了時時譖王楚。不以水沃盆。梅家人聚而嘲笑。王楚背人罵吉了。吉了又愬之。太夫人言楚罵人。太夫人笑不可仰。卽僞召王楚。嗔責悅吉了也。明日爲晦。日爆竹之聲震耳。閩俗燔柴以祀神。仲光草堂燈光爛然。兄弟具衣冠賀母。新歲母言阿壽三孫皆可吾意。阿光久不娶。擇偶嚴人間。那有當意之事。阿光苟念我當以娶婦爲亟。我年且七十。烏能待新婦耶。語次。泫然。仲光動色。拜曰。謹如老母訓。公車歸時。必有以報母。是夜守歲不眠。平明晴。日滿窗。太夫人入而假寐。人家咸閉門。但時時聞爆竹聲耳。

正月四日。仲光束裝拜母赴杭州矣。兄弟送之江干。時江水入春微暖。呂翰來別。堅囑至祖塔院。必謁蠲師。請劍術。舟行二日至滬上。高鑄龍林太守已以綱紀迎於水次。少息。卽趁舟入浙南。中樹多冬榮。交春尙綠。道行過嘉興河之左右。必有小泚。習然上架小石橋。縞袖青裙之女。郎時時隱見於短籬疎樹之間。意態蕭閒。似皆飼蠶之家。以門外多女桑也。舟及拱宸橋。入城尙十里。仲光以行裝付高氏綱紀。自以肩輿至林太守署門。鑄龍及太守咸大笑迎。仲光太守諸郎亦彬彬能文。爭集問訊。仲光下榻於鑄龍庭院中。古槐插天。深堂高窗。地溼如膏。前吳太守曾鞫囚於此。日用三木加囚。囚不能堪。斃於堂下。月十數。盜風雖熄。然枉死亦衆。自太守至。移其刑所於外。拓館館鑄龍。鑄龍掃地焚香。日授其女公子國語。左傳史漢諸書。腥氣爲之一滌。鑄龍者閩之長樂人。學宗程朱。長古文。尤精於吏事。縱論天下大勢。井井然生平以氣節自勵。兄弟友愛。孝友聞於鄉里。父莘農先生入獄。代弟就獄。中讀呻吟語。一一箋註。出獄時。貌乃加豐。仲光曾爲之誌墓。者鑄龍一子一女。妻妾雍睦。門內咸

持禮法蓋真能以身爲憲焉。此時知己歡聚，鑄龍出伯符書盈寸，均言清室且亡。一家不知死所，相與歎息不已。鑄龍曰：仲光此來爲山水，來當不爲功名來也。吾得伯壽書述太夫人言，仲光將覓婦於此，確耶浙產多美人，然頗荏弱，容當爲仲光物色。仲光笑曰：所蓄志願雖契友，不能中也不敢。以此事奉屬林太守，言明日侵晨赴西溪，但未知超山梅花凋謝否。鑄龍大笑曰：詩人未來梅花，又胡敢謝。是夕飲於虛白堂，甫遲明輿夫已大集郡朝之外，命輿至松木場清溪一道，明淨照眼。舟張高篷，開窗可以四瞭。初行溪身絕狹，以岸身束溪，溪路遂不廣，稍轉岸拓溪始大明。遠望高松搖曳於水風之上，雲漫其頂，松外濱水新葦已芽，葦外有一二小樓，簾箔中間見銀紅之衫，則女郎紡紗者也不三里，輒亘以石橋，橋門作半彎形，其上多古檜老翠。四合水清，忽幻爲深藍色，橋門印水作圓影如月，每舟過一橋輒類貫月中行也。垂及樊榭之祠，則老竹交陰，橫溪面幾若路斷。舟子益進，竹梢拂篷，頂聲瑟瑟，然而溪心忽出小石爲岬，狀其上青樹翠蔓，蒙絡搖綴，舟繞岬仄行，始得過而水中葦芽。

觸船底作聲。太守命行厨進湯餅。太守能酒。面溪小飲。談杭州近事。恆以時局爲憂。鑄龍亂以他語曰。今日且談山水。亂離固有日耳。太守無言。船停樊榭祠外。祠旁水而門。立柱水中。支板其上。狀如漁家。然堂之中心就水。砌塼石爲基。自岸通橋入祠。翼以扶欄。祠不過五楹。左祠太鴻。配以夫人蔣氏。並姬月上。右則杭葦甫先生夫人。亦蔣氏。鑄龍曰。樊榭無子。何春渚游西溪田舍。見草堆中樊榭及姬人月上。栗主乃送至武林門外黃山谷祠。今乃復歸西溪矣。仲光曰。此固見之王昶蒲褐山房詩話。然蔡木龕言。又於此少異。主本在桑近仁家。爲童佛庵所竊。詭言得之榛中。以告何春渚。春渚又告之王述庵。故有是舉。特詩人好事之所爲。不足爲據。是日小飲於祠後。小軒中開軒下瞰。卽溪中小渚。夏時多菱茨。鑄龍言。去年至此軒而采菱。小女划小艘方集。其下寺僧以小筐縋百錢與菱娃。娃受錢納菱滿中。舉而上之。佐酒樂甚。惜仲光來非其時耳。飯後易小舟入南漳湖。湖乃非湖。葦蕩也。新葦甫芽。一望皆淺碧。碧盡則濃。檜駢立如蒼屏。檜外皆山溪路。可趣餘杭。鑄龍太守皆曰。必以秋來春。

初蘆葦未長。無復嘉趣。仲光求高江村竹窗故趾。乃不可得。歸時已抵暮。街中紅燭已上。微聞蕭鼓之聲。元宵近矣。

第五章

明日命舟赴超山。舟沿塘西而行。塘西商賈區也。百貨麇集。仲光惡其囂穢。鑄龍笑曰。不從囂穢中。烏見高雅。凡盛饑而得食。雖非美。亦飫矧。乃珍饌。今舟行于繁夥。凌雜中。求高寒耐冷之梅花。是何清福。造化所以少抑仲光者。亦由苦得甘之意。奈何。斯須不復能耐。太守鼓掌大笑。仲光自念兒時寒餒。亦以鑄龍爲有道之言。已而舟行過一村。落景物漸幽。一洗來路。儉俗岸上。已歷歷見梅林。有一人家。梅花作粉霞色。高枝拂簷。草堂門開。簾卷壁上。懸大地圖。一女。郎年可十七八。坐而紡紗。方注目圖中。聞榜聲。乃下。顧溪上行。舟髮長委地。結爲巨辮。長眉入鬢。秀目含波。唇櫻乍啟。似欲呼娘。卽有中年婦人起。自座間與女郎作語。顧遠不可聞。鑄龍拊仲光之肩。言曰。得婦如此。當不惡仲光。吃吃不能答。蓋亦心動不止。微風引舟。舟行頗迅。而梅花

籬落尙隱隱。可見太守方閱昆南陔書。及任草廬文。不暇傾聽。已而舟近超山矣。山分南北二區。山北梅近十萬餘株。南風乍起。梅亦落瓣紛墜。舟上風過。又逐風而起。飛舞空中。梅香本清冷。此時乃并千清萬冷。爲一香。爭趨鼻觀。仲光神宇。皆爲萬梅所奪。木然如癡。外史氏曰。吾乃不審。爾仲光此時心緒。果爲梅花癡耶。或爲紡紗美人癡耶。願仲光不揭心緒。以語我。我又安從知之。旣登岸行梅花中。可四里許。問見村落。聚居花中。如桃源。猝見生客。輒疑訝。相告語。小橋依水。喬木參天。銀牆宛宛。爲梅花環抱。卽牆內之梅。亦駑枝外。糾絳縞駁。色不可辨。認足力稍倦。思就船飲啖。侍者言。停船處。與此至近。轉過小橋。見濃松百餘株。陰鬱中。已漏溪光來。舟卽停松下。則大喜。舟中飯後。往觀宋梅。梅居香海樓前。但有十株。軀幹純綠。以爪撼之。不知所窮。然枝上綴花奇麗可愛。薄暮歸宿大舟。明日至山北遊黑龍洞。山水一湫。澄徹如鏡。畢至石而止。岩石純碧。日中飯于僧院。匆匆遂歸。舟過女郎梅。花籬落則侵曉門關。或未起也。

第六章

仲光既見女郎。則色授魂與。不審其有人家與否。行坐忽忽。如有所失。遂背衆間行。出湧金門。划瓜皮小艇。至竹素園小閣上。茗飲。隔座見一叟。長髯飄然。垂及其腹。修眉廣頰。風貌如仙人。見仲光。目注不已。仲光無敢問訊。然心知其非凡人也。已聞閣外有人呼曰。古梅先生何時入城。不圖于此相見。叟匆匆出面。其人則力引而去。聞將小飲于樓外樓也。樓外樓湖上酒家。俞曲園署匾。面湖而樓。全湖在望。仲光酒渴。亦欲一至其地。忽見叟座間遺一紗囊。啓之。得銀帖三。署銀餅三十枚。金約指二。則大駭。既而私喜。見叟爲有階。亦徐至樓下。甫履樓級。卽聞叟方尋覓紗囊。不見。言曰。是必遺落竹素園座間。吾於隔座見一少年。甚沉毅。似有績學。彼決得吾囊。在理。聞吾在此。或能尋迹而至。定見還也。同座者大笑曰。世安有此。今之少年。侈語新學。其中空空。然見利欲醉。無論拾人遺金。爲無罪。卽爲所遇。胡取左證。而謂其得金耶。叟何輕易冀其珠還。此時仲光適登樓。抗聲曰。君何輕詆。今之少年。不值一錢。遺金固

少年所得跡叟而至本以奉還古梅先生而先生乃預信吾能還金何其聖耶因出紗囊鞠躬上之古梅且自通名古梅大喜同座者失色然亦改容而謝古梅前執仲光之手曰老夫氏劉名芬五世祖爲閩人四世祖從宦至此因家焉乍見足下沉毅非常老夫本欲問訊倉卒中患無禮既而遺金于座固知化爲烏有然以足下在座又信其可以璧反足下道氣盎然似非輕猥少年之比今乃果然老夫所見爲不虛矣此爲老夫社友李君元素此間名孝廉與老夫爲甲子同年于是三人入座同酌仲光能酒百杯以外尙不及亂而古梅亦豪宕善談元素治古文瓣香竟陵古梅殊不謂然元素舉竟陵名篇誦之纍纍然仲光不語古梅疑仲光不解問曰仲光平時亦曾治古文否仲光曰不肖粗涉文翰良不審所謂古文者若以私意言之伯敬雖纖弱尙流轉成篇幅若友夏先生極力摹古舉鼎往往絕贖其遊玄嶽記刻意爲峻峭之文然體物不工語轉鈎棘南嶽記仿封禪儀記矜情作態欲奇而不能奇烏龍潭記則故爲深窈之辭令人讀之徇徂鍾譚合集本爲明張澤刻于蘇州者評語皆

仿友夏已成質文而譚文之尤謬者如府君墓志銘稱先人九歲孤十八爲諸生性
佻達毛傳佻達往來相見貌原非鄙語然習用已久皆爲醜詞寧足以狀先德又母
五十求文稱母爲未亡人果代母爲言文中尙無此體矧乃以三字加生存之母耶
古梅稱可者再元素語塞欲辯乃不得當旣罷酒古梅復執手言曰區區數十金老
夫原不當意然適以成君子之盛德老夫感慰已極不圖足下德器旣遂而文章尤
高老夫家塘西梅花多處足下若尙濡滯宜至超山一遊老夫家近超山但觀岸上
短籬梅花盛開有一怒枝高壓茅簷者是也仲光肺葉大震知古梅決爲美人之父
進身有階乃噤不能答古梅以爲憚行再三速之仲光聲諾古梅始鄭重而去

第七章

仲光自西湖歸已薄暮將作書上其母夫人而虛白堂已肆筵列燭太守鑄龍及諸
郎坐待見仲光歸則爭趨問所遊仲光匿還金事但述古梅延飲且招遊塘西鑄龍
者識高于頂人也立時致賀衆皆驚愕鑄龍曰劉古梅爲塘西文人夙聞有女麗絕

顧擇配至苛意不專屬文士必得有行誼者嫁之今仲光所遇安知不卽其人語次滿堂皆駭仲光久已自信神色轉爲怡然而鑄龍仍諧笑不已且曰吾今有以報賢母矣語次太守忽曰仲光出後有祖塔院僧蠲求見仲光才至杭州何由有方外之友仲光失聲曰劍師也太守不懌曰仲光平日尊韓韓關浮屠而此僧又復善劍吾防爲盛德之累不如勿見仲光不得已述水中得劍事鑄龍立趣出劍劍至寒光渾然燭光爲斂鑄龍歎息以爲寶劍趣舞太守仲子恂士亦好事堅請不已太守亦改容欲觀仲光之技仲光於是脫衣舞寒光上下然技雖非精而間架皆備封閉極嚴密座人均不悉劍爭譁贊以爲精良仲光轉以爲媿私計若呂生在者當齒冷矣收劍著衣飲罷作書上母夫人曰

男蒼跪稟母親膝前舟行二日至滬卽入杭至林太守署中宿于鑄龍館下遊西溪一日遊超山一日宋梅果已見之週身皆碧蘚骨幹奇古著花無多于竹素園遇一老人劉姓名古梅仙風道範似竹林人物遺金座上男拾還之還金非奇而

古梅初不相識。乃信男之必還。斯乃奇也。鑄龍言其家有息女。甚慧而文。然擇耦苛試。進以媒妁。果得當。卽以報母。古梅自言亦閩產也。大哥季弟。未另作書。嫂氏及諸姪。均吉男。蒼跪上。

明日侵晨。仲光命輿赴祖塔院。輿行萬綠中。因憶東坡紫李黃瓜之詩。今春初尙非其時。已而至寺。入門。寺似新修者。曆階而升。有泉二窟。一在階上。一在階下。東坡遊祖塔院詩。石刻尙嵌壁間。右轉見神僧濟師塔。塔表尙存。塔乃非塔。時雨後。墓上聚水一小湫。侍者乃不爲治。入方丈時。而僧蠲已赴理安。謂侍者客至必少。須續當反矣。仲光坐候。可一炊許。侍者入言。主僧歸。仲光入面。僧蠲年可八十餘。聰強。乃類六十面。如削瓜頂上。高凸作肉峯。二掌絕巨。合十作禮。不類履師。傲兀。仲光膜拜。言曰。弟子將履師。命來杭。恭謁大師。願爲俗緣。牽率數日。未至。乃蒙大師下顧。泥犁之罪。弟子焉能任邪。僧蠲以手將起。仲光如舉毫毛。言曰。居士殊拘俗禮。佛門無礙。宜坦率也。乃命坐。曰。昨者僧履以書至。言居士得劍于淵水中。乃不知是何劍也。今將劍。

來未仲光卽自衣底出劍上僧蠲蠲啓匣言曰異哉此直千年以上物耳顧乃無款識何也仲光曰或言爲歐冶所遺弟子不敢奉以爲據僧蠲曰居士良虛心昔者孫退谷得古劍謂是吳季子劍廣徵題詠朱竹垞跋語謂臘有銘篆文字不可辨合之韋續五十六體書無一似其曰季子劍者先生審定之辭云爾居士想亦聞之仲光曰此見之王漁洋先生雙劍行自注之詞弟子譴陋不敢臆度僧蠲笑曰名士好古不問物之真贗但以古爲貴可哂也僧履曾教爾以劍法否仲光面頰不敢答僧蠲曰聞居士僅有五閱月之工安足言劍茲有劍訣一卷是老僧定餘所草尙有口訣數語授汝仲光聞言立造僧蠲之前跪而受之膜拜致謝僧蠲曰老僧旦晚就塔此間傳法可數人然皆俗骨拳技尙精劍則非其所長惟有濰縣王王就我受鐵椎法今不審其人何往矣居士旦晚勿倦勿怠按譜以求運以口訣當精其術天下且亂居士非富貴中人此行亦不得售居士當不以老僧之言爲非祥也仲光曰弟子知之此來爲故人來爲大師來爲山水來不爲科名來也僧蠲微笑曰此外尙有慈命

胡乃不告老僧仲光大駭以蠲師爲前知顧信命至堅亦不追問休咎歛劍興辭僧蠲送之門外曰居士好事多磨天下無一拾卽得者也

第八章

連日春雨塘西梅花半皆爲雨摧落一日微晴劉古梅籬外水次有一小舟其中端坐一少年其旁置書一冊舟止籬下少年沿石步上時已薄暮草堂甫上燈有一小童歛紡機置之壁間壁上大陸地圖尙張傍有小跋數行作簪花之格書云此大陸圖詳于內地而略于蒙古北面劃成空格蒙古固多戈壁然亦宜稍分區域俾讀者易審知其兵要所在中國幅員過廣經營弗及北庭之備弛矣下書光緒戊戌古越女士劉麗瓊跋少年讀時微微頓足曰此真邴仲光偶矣而蠲師言好事多磨寧有變耶小童見客驚怪卽前致問仲光曰爾主人約我我邴姓名蒼爲我敬上主人童子曰主人方赴鄰家行歸矣語未竟果聞款扉聲古梅入見仲光握手大笑稱爲信人卽延坐仲光坐處見有小箱篋已束標以禮部會試劉仲光盼不已古梅笑曰鄙

人契友給事中高公子驄以書來速入都鄙人安有宦情書言盤山多松石之勝特假會試之名往遊此所謂一醉無名特倚花也相與大笑古梅匆匆入內似趣治具旋出延客西軒書高于屋陳設古雅端研四五枚皆作深紫之色書櫥之後有小臥室則古梅常所假寐者也夕膳既陳但有雞荀然烹治甚精潔出陳釀二巨甕主客對飲飛觴無算古梅忽曰昔至金門島于鄭延平祠中曾遇中年人稱曰雲岫亦邴姓閩中此姓絕寡因語言投契定交于祠中後此音問遂梗雲君曾否爲足下宗英仲光泫然曰先君子也下世十五年矣然則先生爲小子父執矣古梅亦愴然久之罷酒歸宿移燈入室仲光思茶欲以解醒則小童已將茗入見案有四溟山人詩集一卷第一葉蠅頭細字作評語曰王李才力巨于茂秦然能造盛唐之域如五言近體清空高簡斷非弇州滄溟大鼓洪鐘所及名士護前而明人又喜自矜名位四溟責望其友遂成水火嗚呼炎涼之態中于詩境則宜茂秦之以布衣終也下不署名而字體宛肖地圖跋尾且每篇得意處輒嵌以小印章篆作梅兒二字然則麗瓊小

名矣。略翻數帙如絕漠兼天盡。交河蕩日寒。夢入楚天遠。愁連湘水深。暝烟官樹合。寒雨驛燈孤。山橫邊色斷。日沒野陰重。晚山當座出。風竹滿樓寒。諸句皆加密圈。不期私歎曰。梅兒何爾所愜心者。一一皆中我。邴仲光心坎也。寢時輾轉不能成寐。遲明聞西軒有人笑聲。匆匆起視。則李元素至矣。早膳既陳。座間微察元素神宇。時時有不足仲光之意。仲光猝覺。知舐觸竟陵之語。爲元素所銜。將來乞婚必爲所梗。然則蠲師之言驗矣。飯後古梅約遊超山。仲光力辭而來。舟尙停水際。竟趁潮行。古梅元素並約于都門相見。時已過上元。鑄龍敦促入都。經一日夜。至上海。更三日至天津。遂趁車入都。然各省公車亦續續至矣。

第九章

都下每值會試之年。則省館縣館。凡宦京秩而貧而假居其間者。均遷避而居舉子。九卿大老必俟舉子往拜。奉土儀。述世誼。然後車聲鱗鱗。然一刺下投。不值卽去。明日以橫柬召。無數酸腐聚宴于酒堂。主人豐貂暖帽。名爲下座。待客而主人往往後。

客而至。非言下。值晚。卽樞務忙也。坐間諧語。間作然諧。必寓莊。嶄然禦人。不聽作簡。藝之語。貴官養尊態度。若有祕訣。著爲成書。相承而下。間有薦寵下輩者。數日。亦或一至。則周身官服。獨去朝冠。而加瓜棱之帽。名曰便服。侍者逐後。捧冠合衣。囊寘之。客榻屏息。門外俟進止。客方舉茶。卽已。拳簾奔入。取榻上物。行沿路呼車。而貴官方遲遲作鄉間瑣語。佯示親暱。驗之千百。匪不如是。仲光鑄龍。平日傲兀。無交。則儼一旅店。糞除以安書劍。一宿之後。卽往訪修伯苻。伯苻兄弟同居。弟曰仲苻。在白廟胡同小巷。僅足通車。而湫水積焉。入門高槐翳瓦几。案皆陳舊殘書。滿架蓋自竹葆先生逝後。兄弟忍貧不出。伯苻知天下大勢已渙。滿漢之辨愈明。而革命之禍亦愈急。爲書萬言。徧陳諸邸。諸邸方廣樹羽翼。收羅督撫。爲生財道路。謂朝廷有彌天之福。凡在玉牒。當永享富貴。及見伯苻。首揭禍機。咸震怒。以爲叛逆。且斥漢奴焉。敢爾。雖伯苻岳氏。聯仙杏先生。亦頗不謂然。伯苻奇窘。乃立知恥。會聯合同志。磨勵以支撐國家。而愛新覺羅族之忿戾者。以人告伯苻。爾再爲妖妄之言。當下詔獄。伯苻悲憤。

死志已決。故長日恆悒悒無歡。迨鑄龍仲光刺入伯符自夫人帷中奔出。執手無言。而萬疊情波團結一好字。遲遲始衝唇而出。謂鑄龍曰。先君詩稿乃蒙二君校勘。閩中劊劊非良。尙有訛舛。吾已閉門更正。實則校書如掃落葉。掃乃愈多。今幸完整。行時敬以奉餉。因縱論世局。久之伯符忽曰。二君知昆南陔任草廬踪跡乎。鑄龍仲光同聲曰。此有心人也。南陔學邃。草廬文高。伯符曰。昨王少蘅到此。言南陔居宣武門外。署曰萬木草堂。同時名士大集其門。不日將開茶會。二君能否一往。鑄龍諾。仲光獨不謂然。伯符曰。何也。仲光曰。羣盜方謀。夜竊。黑衣不火。竄伏牆隅。而突有人揭高燎。鳴大鉦。止盜勿竊。且欲窮燭其所匿之地。則含沙之射禍在眉睫。嗟夫。南陔草廬忠于國家固矣。如殺身何也。伯符意殊忤。然知仲光不長于幹濟。則盛言昆明湖之勝。立約往遊。二子皆諾。遂歸。几上見柬。則南陔先生訂勝集于嵩雲草堂。鑄龍如約。仲光弗署。

都下旅館。館後或留空曠之地。或便溺及之。往往成爲穢墟。而仲光所居館。幸嚴潔。屋後大樹參天。繚垣之內。地曠可經畝。仲光飲罷。出蠲師劍譜。按口訣而舞。一前一突。似皆切中敵之要害。漸練漸熟。較諸當時。初試已隔霄壤。一日舞罷。日已垂暮。納劍歸房。而鑄龍已反述嵩雲草堂勝集事。極稱南陔演說之工。仲光曰。座間有京僚否。鑄龍曰。有之。然天下知名之士。多于京僚。仲光曰。中樞恨南陔刺骨。宜爲之備。滄海橫流。中獨此師弟。持立憲之說。挽回大局。吾服之至矣。然吾目光所及。專注豺虎。須知天下有快意之談。必兆違言之事。矧痛揭國家積弊之府。一歸立憲。則羣小皆無噉飯之地。必集矢于建議之人。叔苴子曰。當權時而執經。皆可言。而不可行。處經時而用權。皆可行。而不可言。今日雖名經時。實則宿弊山積。瘡于首者。固惡人之揭其冠也。吾慄慄懼禍。變之發發。且加甚。鑄龍曰。天祚中國。寧有此事。仲光歎曰。長白王氣盡矣。飯時侍者以柬至。蓋伯苻書。以明日往遊昆明湖。于是均早寢。甫辨色。卽起戒車。與伯苻期于海淀。車行出彰儀門。時海淀馳道未砌。柳亦未繁。車過海淀後。

衆綠中似橫白堊一片。伯苻遙指曰：湖堤也。柳夾堤爲行多。乾隆手書碑不數武，一立銅牛一臥于廊如亭。下亭左有門嚴閉，自隙望見馳道宛宛入林而沒。殿簷隱隱突出林表。伯苻曰：此禁地，可勿入。湖平如鏡，葭葦已芽，惟平瀾堂水深波綠。迤南有飛橋一道，高可十餘級，石滑如沃，幾不可步。四顧全湖，悉懸眉睫。葭葦盡處，但見山上飛樓橋上小亭如十洲所寫之工筆。仙山樓閣也。遊可竟日，歸飯于海淀。伯苻仲光咸有詩鑄龍爲之序。明日方志初至，深以不與遊爲歉。言昨日某公宴西人于天寧寺，蘭公遣騎逮捕，幾兆交涉。政府排外之心，日急。聞昆任二先生方提倡變易新政，宗室切齒，禍不遠矣。志初名嘉樹，能書而工文。平日以幹濟自負，甚違草盧之言。恆欲一見草盧爲快。鑄龍曰：余必爲君介紹。

第十一章

時爲春仲，海棠丁香已開。伯苻招飲，則以藤花將糖爲饅頭，烹魚沽酒飲。二子仲苻往來將器具如僕，御命坐弗坐，執禮甚恭。或滿人家法然也。酒罷，仲苻出澄泥印章。

二一贈鑄龍一贈仲光皆自篆刻甚奇古鑄龍一章則微近鄧完白不如所贈仲光佳也仲光既歸儿上得母夫人手諭曰

得爾書已平安抵京西溪超山之遊何乃不作小記余老矣不能躬至佳勝之地爾胡不曲狀山容水態以娛我且並不施圖畫用餉老母何也若兄近與張氏業茶出三千金爲營轉云可得利倍之果爾汝可留京或入監讀書余不望爾以科名能友海內名宿成爾學業用文章名世我願遂矣三月後爾兄必郵置三百金與爾毋論得售與否總以留京研學爲第一義劉氏姻事可託鑄龍爲爾圖之家中平安爾弟肺病終未愈然入春尙不甚劇母諭

仲光得書大慰持示鑄龍鑄龍大笑曰賢母以事命我敢不盡力顧古梅久未見不審所寓何所明日必至杭州及錢塘館尋之顧得此絕代麗姝爲偶仲光將何以報我也已而試期至大總裁爲苟公研孔次爲錢公大用又次則張李二公仲光草草撲筆而歸鑄龍出較晚見諸小寓鑄龍言今日乃與古梅同號談至暢美盛推仲光

不。已。吾。乘。間。以。媒。自。薦。古。梅。久。不。答。已。曰。得。壻。如。仲。光。者。何。求。顧。芳。無。子。內。子。不。欲。此。女。遠。離。仲。光。閩。人。匆。匆。攜。小。女。歸。者。吾。夫。婦。將。何。所。恃。昨。見。仲。光。鄙。意。卽。屬。因。與。元。素。謀。之。元。素。決。策。一。如。內。子。吾。甚。恨。失。此。快。壻。也。仲。光。爽。然。如。當。嚴。寒。之。時。坐。大。龍。湫。怒。瀑。之。下。心。肺。皆。僵。知。元。素。之。讒。行。矣。顧。得。母。書。不。聽。歸。則。往。來。京。浙。之。間。事。尙。可。圖。出。閨。卽。焚。其。稿。不。示。人。而。伯。苻。之。場。期。亦。至。愛。新。覺。羅。氏。與。考。文。一。詩。一。而。已。伯。苻。以。書。劣。不。稱。意。鑄。龍。仲。光。覓。得。其。文。稿。以。爲。雄。渾。近。熊。鍾。陵。晨。餐。時。方。共。把。玩。而。侍。者。奔。入。言。伯。苻。中。矣。仲。光。鑄。龍。大。悅。如。己。獲。售。仲。光。卽。裂。絹。素。寫。墨。菊。一。叢。爲。賀。意。花。開。秋。深。矣。旣。至。白。廟。門。外。報。子。三。五。人。囚。首。垢。面。冠。破。冠。鷗。蹲。于。階。級。之。下。口。中。長。號。似。曲。非。曲。佹。儂。若。丐。仲。光。鑄。龍。相。顧。愕。然。伯。苻。持。畫。菊。把。玩。太。息。曰。嗟。夫。我。生。不。辰。恨。不。與。二。君。同。產。乾。嘉。時。也。今。日。人。言。某。國。人。以。兵。蹂。躪。卽。墨。孔。廟。都。下。舉。子。嘩。噪。將。上。書。御。史。台。請。朝。廷。聲。討。其。罪。吾。亦。將。上。書。請。二。君。屬。草。鑄。龍。奮。然。索。筆。仲。光。曰。甲。午。一。敗。海。師。煨。燼。決。不。足。戰。吾。意。請。先。下。罪。己。之。詔。感。動。海。內。然。後。

卽圖立憲庶能挽人心而存國脈伯苻色動鑄龍則大贊以爲當於是起草仲光坐而贊助書成明日至察院院長爲史思明副則于沉極伺台門三日弗至第四日于車至仲光揖而上書台門幽慘如鄴都泥深沒髀餓隸類數日不食者青衣加破絮之上髮森森如蝟毛頂覆敝冠向仲光索錢仲光曰此所謂柏台也以狀態言之寧有不亡國者

第十二章

明日侵晨台役二人持長條取仲光入面台長仲光笑曰此御史逮人耳卽從二役行鑄龍馳書與伯苻伯苻亦至三人同詣臺左堂列長案掌科御史高坐謂仲光曰昨日陳書請罪已措詞無乃太酷仲光曰大臣不言而小臣言之何名爲酷御史曰爾書中有言外交事此事不屬臺屬總理衙門仲光曰總理衙門不能代奏然我自言孔廟耳與外交胡涉御史曰先生來取科名何與外事仲光曰科名輕名教重國體淪喪尙何有于科名御史曰此事終不能奏仲光曰合台可謂無人旣如是趣還

吾書遂出。伯符不語時。草廬之友。麥夢華亦上書不報。仲光曰：外患不足憂，憂在內。夔史思明與賊同名，姓于又權奸之子，國安得久耶？已而榜出，鑄龍。仲光皆報罷而古梅名在一百五十二。仲光笑曰：終竟老阿婆勝少年矣。鑄龍方以身佐林太守，榜後卽匆匆出都。仲光送至津門，握手悲慨不已。遂移書劍寓松筠庵，皮置書籍，甫竟而古梅至，衣冠楚楚。然仲光笑逐于門曰：今日龍頭果屬老成。古梅亦笑曰：此抱朴子所謂媠母有所善而不能救其醜醜篤也。垂老之年而貢謬于英俊之前，辱良不翅。任草廬負蓋世盛名而足下亦文壇詞傑，乃均報罷闈中人眼光注及，駑朽令人索解不得。高給諫必欲鄙人留京，且令遠致其眷口。吾一無所戀，戀吾籬落梅花耳。仲光曰：適購得良醞，且就小飲。古梅曰：人事累人，尙須僕僕亟拜。此間爲都門勝迹，得暇卽來。遂登車行。仲光自念美人至而元素行，蠲師之言未嘗斥我無望，特多磨耳。瞥眼見劍在枕底，卽抽赴後園，溫其藝譜。旣精熟，漸覺人劍已合，寒光融成一片雪花雨點，咸不能霑。則大喜過望，自謂勝呂生矣。舞方濃，酣侍者入言林晚翠至，晚

翠者七閩才子也。白晳玉立，博極羣書。仲光善其兩叔，晚翠執禮甚恭。相見痛詆時宰，且稱昆任以爲道，能救時。自云身在南陔門下，仲光曰：南陔吾未之面。昨者草廬再至，議論奇闢，果遂其才。畫必有勳効。晚翠曰：內中將以李鄴侯處南陔，吾輩不日可以召對。譚劉楊康諸君子亦且連袂而升。又將徵取晉孝思閣，復諸人同拯時局。開懋勤殿，召羣英討論時政。足下亦有意乎？仲光曰：豐草不秀，瘠土巨魚不生。小水經營天下，必不出諸陋儒之幹濟。僕海隅賤士，寄迹京師，自審不能救國，謹拭目以觀諸君之長。然而天下皆理己，獨亂國非其國也。鄰國皆險己，獨易國非其國也。今以孤立之國，蝨于列強之間，人方眈眈我，乃夢夢積習已，錮二三君子，必欲救之禍發，且不旋踵矣。奈何！晚翠無言而去。

第十三章

夏中十刹海，荷花受日紅。乃欲滴微風，一過柳絲四。裊仲光以車至水次，見柳陰中一長髯之叟，風動其髯，反扇幾覆其面。則劉古梅也。其後一中年婦人隨之，旁立一

美人玉容幾欲爲日炙。消去瓣而髻髮黑逾漆。冰紈在手指嫩如玉。遊人過者匪不目送。古梅見仲光至。卽呼與同行。謂其夫人曰。此卽當日還金之邴郎也。仲光進揖。古梅又謂其女曰。是爲雲君先生之仲子雲君吾友。此世兄也。爾詩文後當取正于仲兄。仲光聞言。復揖女郎。女郎從容檢衽。蕭閒若無事。然仲光曰。聞先生觀政秋曹。夫人世妹。何時至此。古梅曰。入都十日矣。居斜街近花市。頗饒花竹。與松筠之庵。相間。不能一里。鄙人嬾應公事。仲光可時過我耳。仲光大悅。歸後期以明日往造古梅。入門荷香沁腦。密竹作小屏。橫巨門內。扶闌爲淺黃之色。曲曲轉入小堂。闌外編竹爲籬。蔦蘿宛宛。齊升籬上。玻璃窗內。銀紅之奩。半揭梅兒。方伏案作書。髻上加一玉簪。適當窗格。仲光不敢正視。卽舉聲呼古梅先生。古梅不衫不履而出。長髯飄然。案上置一瓷盆。碧藕粗如人臂。壁上懸郭汾陽雪山。旁有王船山長聯。書法險勁。高柳蔭于屋後。扶壁施窗。濃綠如染。古梅曰。北來過夏。此爲第一遭。吾終念塘西樂也。荆人遊歸。忽病幾成風癱。似與北地氣候違忤。小女扶持。抑搔連夜。劬極轉有怡色。殆

防其母弗安。老夫慰情，賴有此女。彼方作十刹海看荷花記，能得先生一爲潤色，不寧佳也。因呼梅兒脫稿，未也。大師在此，可勿畏慚。女應聲曰：近兒學羅昭諫作短篇文字，氣蹙而筋攣，恐不值仲光先生一笑。然呈政終有日耳。語次，盈盈而出不事華飾，媚若天人。仲光進作，躡女嫣然，匆匆作禮而入。古梅肅坐，出龍眠山水長卷示仲光。千螺萬髻，皴法細如篆紋。水石松篁，部署皆無凡筆。竹垞江邨諸老，均有題詠。蓋至寶也。談次，古梅言：近日朝局漸見轉機，內中有易新人之信。不日見諸朝報，然頑固大老，騁私叢怨，亦萬不可久。吾輩或且拭目長觀新政耳。仲光歎曰：不去慶父魯難未已。羣咻方熾，親貴用事而權錙窟宅，宮掖卽有忠言不敵牙孽鄙意，未見其能更革也。古梅曰：然則仲光之意云何？仲光曰：救國必立憲，去奸必專制。不立憲不足以平天下之心，而誅奸不行專制，奸亦弗盡。賤子心眼皆冷，舍書籍山水外一無所嗜，且自問非經緯區宇之人，旦晚亦圖隱遯耳。古梅曰：然則先生胡不南歸？仲光笑而不答。

第十四章

一日外間忽傳以譚士洞林郁劉廣智楊蛻入值軍機仲光取朝報視之果然頓足曰用人太驟大非國家之福龍宗華方用事李閣隱奸二憾不去乃以勇健少年入贊樞近禍不遠矣吾當往訪林晚翠問狀林晚翠者林郁也在四軍機爲最少年居皮庫營林太史家頗有亭臺花柳之勝然隣右咸言凶宅晚翠毅然居其後園高柳蔽天小堂中以巨甕疊而爲柱加以白堊厥狀甚怪林太史言有蟒伏其下居停主人用形家言製此爲厭勝仲光常引以爲笑既至晚翠方下值晉孝思已前在晉君號素庵詩人也長於幹濟爲仲光同年生相見道故晉言昨日已召對稱旨其大意謂不願陛下爲堯舜竊願陛下爲英雄云云於是飭入總理衙門司俄股晉知時政不易爲方力勸晚翠審慎且言某君方有寵於東朝事必與商勿專斷此所謂爲政不難不得罪於巨室也晚翠曰譚君甚錚錚然當力陳之時天下上書言事者日爲章且數百一日得旨飭任草廬司時務報詔勅所及天下稱快咸喁喁望治以爲指

顧可得太平。仲光至此亦搖搖然。參以疑信。然終以不躁進爲上策。長日讀書於松筠庵。晚涼仍習劍法。一日薄暮。忽言伯符來訪。肅坐大悅。伯符曰。今來與仲光小別。吾奉勅將赴東洋調查學務。仲光曰。君行甚善。余疑變政太驟。而神奸巨蠹仍伏東朝肘腋之下。萬一暴發。禍不可救。足下能少濡滯於外。亦可不與其憂。且吾亦甚欲草廬至江南也。伯符曰。昨日吾亦召對養心殿。上意甚優渥。方欲急去。此老悖頑固大臣用待維新之英俊。仲光愀然曰。此宣公所謂神斷。失於太速。斷速則寡恕於人。寡恕則重臣懼禍。反側之釁易生。彼八旂諸老。寧能舍其固有之富貴。拱手受黜。吾恨不識譚公。力陳其不可。伯符亦爽然久之。明日得邸抄。以王少衡一狀。同時禮部六堂均黜。免仲光頓足曰。敗矣。六堂中三堂滿人。也不知譚林諸君子有以備之否。此時鑄龍書至。稱賀朝廷得人。書曰。

自與仲光別歸杭。後林太守力創兩學堂。以一府之力支此繁費。同官皆愕。而公毅然無顧。吾日夕爲公區劃。然中峯昏庸。而方伯狡譎。廉訪則懨懨如死人。新政

雖立決浙中奉行必不力聞南陔先生有請上御門誓衆之言鄙意亦爾不如是不足以堅天下之心所下詔勅聞多晚翠署草讀者淚落此中國再造之機也古梅定多相見爲此問訊不備

啓鑄龍書後伯壽書亦續至郵致三百金書言茶市得三千餘金頗不惡姑氏家乃死亡相續坤兄疽發背死於舟中嫂縊而殉姑丈亦以老病卒含殮悉吾家供之姑已衰耗但有一孫母月以十金餉姑氏不時饋以饌饐謂府君僅此一妹母不忍目擊其寒餒也劉氏姻事如何老母至以爲念兄耆書仲光歎曰此舉大合人心吾固謂吾母盛德之必有此也

第十五章

晉孝思者達于政體人也知事急乃戢足不出而林晚翠忽匆匆叩其戶言東朝且歸龍宗華將興大獄友人促我至公使館潛踪我恥爲之今夕當歸焚所有書札勿致爲瓜蔓之抄孝思曰瀏陽如何晚翠曰瀏陽渾然一無所懼孝思曰吾固謂其至

此仲光亦爲君危之晚翠默然歸皮庫營夜燈已上林太史兄弟趣飯晚翠不能進繞床行至漏三下乃發篋取所有緘札盡付焚如自念身受不次之擢年未三十死以報國亦無所媿特嬌妻尙在江表莫得一面英烈之性必從吾死不期酸淚如綆既而奮然曰奸臣當道闔豎竊權重臣無張柬之諸老此事又胡可了丈夫死耳但使官家不爲金鏞城之行足矣想河陰之禍亦不甚遠時已八月落葉滿地夜風一振橐橐如人履聲晚翠笑曰忠臣殉國亦乃有鬼卽吾窗勾取乎諸稿旣焚輾轉不能成寐僕朱貴已醒伺于門外晚翠呼曰朱貴汝前外間消息甚惡余必下獄脫蹈不測汝必至菜市收吾尸告之林公兄弟趣運吾骨歸閩慎勿令主母知之主母性烈必以死殉無益也吾家兄弟咸未娶嗣續非我所重書篋中餘金十數汝將去備一羊裘見裘應念我也朱貴跪而大哭晚翠無言久乃曰朱貴汝不審事局此焉足哭也語次已遲明忽聞履聲似有數人接踵入求見林軍機晚翠甫出見一番役從林僕言奉五城御史命請林軍機至署晚翠從容曰知之著衣旣竟不及面太史門

外邏卒十餘卽欲加以鎗鎗晚翠曰吾國之大臣有罪至大理言之胡得無禮番役如言遂送詔獄晚翠于獄中見同時被逮者昆公廣人楊公清壽楊公蛻劉公廣智譚公士洞彼此太息知爲奸臣所中外間傳言得旨將以兵圍頤和園六君子自念朱諭見在初無此勅必待庭訊事或得直晚翠亦知禍及然尙抗爽令獄卒作雞子食之是日有人上密疏言弑逆果實則事連官家不如不庭鞠斬之可以省事遲明事下大理將六君子赴菜市而松筠庵者近宣武門人聲喧唳言今斬大臣六人仲光方爲修仲萬寫山水擲筆出視禁軍如林檻車第一輛卽見晚翠引目四盼仲光眼淚如綆隨至菜市伍伯年可五十餘冠破冠點點皆紫血加犢鼻裙亦爲血腥所漬履上以厚布爲幕積血已成深紫手一小繩時林太史已以蘆蓆陳于仲三元蠟肆之前晚翠常服向闕謝遂引至席上伍伯以繩加晚翠之口自口繞頰合于頂上並髮引之更二人引臂方欲下刃仲光卽閉目行歷過譚公之前英爽之氣凜凜然仲光奔歸伏几大哭不已更三小時復至刑所則朱貴方坐尸旁林太史以伍百金

令人縫其首。白日垂匿。大風揚塵。六君子之尸赫然市上。而天地皆含陰慘之色矣。是夜卽有人大書于市門曰：大事已去。棄骨不足惜也。定論難泯。斬頭容何傷乎。時戊戌八月十四日也。是日東朝旨下四捕黨人矣。

第十六章

禍機未發。南陔已覺。卽行草廬。亦微服自脫。南陔行及塘沽。邏騎已至。時有二舟。南陔已附甲舟。忽移而至乙乙舟。行邏騎乃不及。龍宗華飛檄趣兵艦追之。艦長故愆其期。至燕臺而前舟已發。卽馳電滬上止之。南陔舟至崇明。有外國兵官持南陔影片登舟。索得南陔。卽引過兵艦。滬上邏者至。遂左。于是懸金購賞。得南陔草廬首級者。予十萬金。政府則盡反四君子所定之新政。極力排外。且漸漸議廢立矣。京僚與南陔往來者皆下獄。或奪職去。王少衡髡而行走。至山東。遂航東洋。伯苻亦怏怏歸。知事不可爲。遂閉戶不出。教其弟妹著書自遣。仲光居松筠庵。日無聊賴。然間日必造古梅。而夫人病亦日篤。飲啖皆需人。古梅愀然思歸。顧以妻病不得去。及見仲光。

至卽長喟曰嗟夫仲光吾爲盤山來乃不見松石而妻病纏綿至此欲歸不得將奈何也仲光曰日來刑政顛倒濫殺不辜吾觀樞廷舉動必且不利於官家恐不日將行侯景之事古梅曰此輩首鼠兩端安能爲侯景且酒色之軀不久卽死若易光者亡國徒也仲光料六君子必敗今乃果然幸吾宦隱無進取之志仲光嗜學不問時事老夫心慕林宗然仲光所爲直徐孺子耳仲光曰媿承長者獎引實則下走宦情盡矣西山紅葉已大半經霜祕魔岩至幽邃雖未抵盤山雄秀然林壑亦佳走擬明日往遊不審先生能否爲侶古梅曰滄海橫流僅能作此自遣耳語次梅兒盈盈自帷中出謂杏仁之露垂罄當續購以供阿母夜飲忽聞仲光招遊西山卽日記入城時車上見西山在暮雲中作黃色殆爲風沙所掩想紅葉當在山中仲兄能否卽山中爲作長卷俾小妹臨學較親履其中容當勝耳惜阿母清恙未瘳不爾當附板輿一覽北來之勝仲光惶恐言曰拙畫未有導師妹氏不以爲醜者必以長卷奉餉左右女已易藕白夾衫中襯粉霞之衣初不華飾而斌媚中却含大家風範仲光曰斜

街菊花已繁綠者尤爲奇種妹氏當已見之梅兒曰吾鄉丁家善蒔菊固有綠者阿爺曾憶得榆園老人以數本餉草堂乎古梅曰吾爾來爲若母病花事那復經心吾至西山經宿卽歸夜來藥茗之役又專累吾兒矣女無言眼波欲涕不語而入古梅歎曰孝哉女也

第十七章

西山亦名翠微所謂八大處者肩輿俄頃可盡祕魔岩特一片岩石弩出下僅容人僂入而已山重土瘠無佳竹美木唯陂陀上下一望皆紅葉間以微黃古寺鐘樓聳出紅葉之上頗類清暉老人所寫秋山行旅圖亦以胭脂點染作楓葉對之宛肖石級蜿蜒直趣獅子窩半山作飛樓則大鐺結構以避暑者壁上寫聊齋狐鬼幻相爲男女相見狀筆致儉不可耐二人下榻僧寮僧進素食幸攜得藏醞坐而對酌是夜月明遂同步至龍王堂老柏參天月光全爲蔽掩時時篩碎光而已古梅嘆曰老夫十上春官不圖六十之年乃困此冷曹又值世變家下薄田二十頃歲入足以自贍

且有羨餘。本可終吾身世。從子子驥。亦頗忠篤。老夫將嗣。以爲子。惟室女未字。前者鑄龍來言。將爲足下媒介。深中老夫所懷。顧荆人防足下歸閩。不欲遠離此女。而仲光又有老母。不能僑寓。以從老夫。世事固有不遂。意如此者。令人懊懣不已。仲光噤不能答。但問子驥爲人。並問浙西水田。能否爲大水淹沒。託以他語。亂之。古梅亦不之覺。因亦縱論田事。更深歸寢。月影穿窗。百蟲皆絕。仲光成五古一篇。書之僧壁。明晨進食。命輿將至寶珠寺。忽山下騎從雜遝。均翎頂。其後馬車中。端坐一少年。復過十餘騎。更一馬車。服飾如之。僧驚曰。是臨淮王及蘭公也。意氣傲兀。下令盡屏遊人。而仲光古梅已令從者以臥具先行。遂徐步向寶珠寺。見所謂蘭公者。方抽馬策。力鞭侍者。咆哮之聲。達於山半。仲光笑曰。吾讀漢書諸王列傳。均有此種氣概。將來修清書者。皆足資爲史料矣。古梅大笑。寶珠寺據山高處。下見麥田。殿後有小洞。祠僧象沈深。陰濕一無足紀。古梅曰。此似草昧。令余念及鄉山。不已。是日歸古梅。延仲光至家同飯。梅兒迎於門。次日阿爺及仲兄歸矣。西山紅葉如何。仲光見梅兒襟上綴

白菊一朵鮮明映肉似花朵之媚遠不及人忽聞呼仲兒聲柔媚欲醉然強自支厲肅然爲禮梅兒曰仲兄爲我作得長卷未也古梅曰本不以今日歸乃遇宗室兩驕王激訐呼哩儉不能耐安有乾淨之地足置筆研仲光與我家世誼必不吝此尺幅之畫本汝毋憂不得也若母宵來何似女曰宵來尙寧貼但時時問外間殺人事意其中必有冤抑兒不敢爲母述六君子但言誅六內監盜物事者母亦昏沈睡去兒讀陳簡齋詩漏下四刻睡耳古梅曰外間可下榻仲光且勿歸炸子橋也

第十八章

古梅壁上所懸王船山七言楹帖蓋集放翁詩書爲半酣差近古樓無一面不當山風神疎宕而筆力峭勁仲光徘徊其下不已梅兒妝竟行及堂次見仲光面壁呼曰仲兄頗能起早此船山書先祖得自湖南者妹去年讀船山史論竟月始畢其中議論怫忤人意甚多畧舉一條謂李後主之死實徐鉉殺之妹欲著論駁詰以事中止今質諸仲兄頗以船山爲然否仲光乍被問愕然少須乃曰否否按宋王性之默記

徐鉉歸朝爲左騎常侍遷給事中。太宗問曾見李煜否。鉉對以臣安敢私見之上。曰卿第往相見可矣。望門下馬。但一老卒。徐言願見太尉。卒言有旨不與人接。豈可見也。鉉曰我乃奉旨。遂入。李主紗帽道服而出。鉉下拜。主遂下階。引手以上相持。大哭。主忽長吁嘆曰。悔殺潘佑。鉉歸後有旨再對。鉉不敢隱。遂有秦王賜牽機藥之事。船山殆據此耳。不知張敞之視昌邑王。以王風狂白宣帝。宣帝遂不殺昌邑。以帝力足以制昌邑。且知其無能爲耳。今李煜有一江春水向東流之句。已觸太宗之忌。鉉雖不言。太宗亦決殺之。且鉉之來。太宗亦以試鉉之心。安知左右不無偵伺之人。鉉果一語粉飾如張敞者。立可齏粉。但觀後此李煜之神道碑。必令徐鉉爲之。正以觀其向背。幸文中有投杼致慈親之惑。乞火無隣婦之詞。始勞因壘之師。終後塗山之會。太宗始爲釋。然當時鉉之性命。息息與後主相繫。責鉉以不能殉國。可也。謂太宗無意殺煜。殺之自鉉不可也。梅兒聞言。瓠犀微展曰。仲兄大有史眼。古梅已出言曰。仲光以稗史證正史。令人聞之。爽然梅兒當拜。仲兄門下矣。時已午。膳得高給。諫書言

朝廷將建儲。擬以崇武清爲師保。高庚輔之。將謀內禪。吳帥研山劉公飛電止龍宗華。得無事。古梅讀書竟言曰。仲光國家之禍未艾也。國有君而求君。奈何弗亂。

第十九章

外史氏曰。小說之體。非編年之書也。有可記者。則雖瑣瑣屑屑。咸著於編。苟無可記。則一行之間。可越過一年。茲已交庚子三月矣。庚子之局。千頭萬緒。將從何處着筆。然亂天下者。義和團匪也。則爲書者。不能不發端於此。時邴仲光居都下。垂三年矣。文章日高。而劍術亦日精。顧終祕其術。不敢語人。春季花開。間行至長椿寺。見殿廊之下。聚可數百人。廊上焚香。供濟顛神位。十餘人。以紅巾裹首。瞪目吐沫。伸拳作勢。呼囂之聲。四徹。仲光大怪。問之傍人。曰。此義和神拳也。能避鎗礮之子。洋鬼決無敢近。亦不能勝。旦晚殲盡。此碧眼虬髯者。天下平矣。仲光笑曰。碧眼虬髯者。寧可盡耶。曰。否。爲人無多。天津一國。交民巷一國。西什庫又一國。滅此三國。則餘衆慄懼。散走。易於撲滅。今大師兄方託鴻鈞老祖及神僧濟顛之力。合衆十餘萬。彼三國之洋人。

又何能爲仲光曰鴻鈞老祖何人間有一老叟歎曰少年竟不讀書並老祖神通乃不之知實告汝古有寶書曰封神傳老祖爲元始天尊及通天教主之師又有濟顛傳茶館中所常講者征服小西天劉香妙及狄小霞神通廣大今降神輔我大清滅此洋鬼先生如此文雅乃此等典故亦茫然不知非老人多事今日讀書少年但知得入股宜其不能治天下也仲光旣憫其愚又不敢縱聲而笑遂怏怏歸團匪逐處皆起當此之時東朝及官家方居頤和園初聞拳匪起事卽降旨飭步軍統領與神機虎神營嚴捕首要各犯卽飭解散脅從將城內外所設壇棚盡行拆毀識者額手稱快而親貴大臣均弗悅以爲洋人猖獗必獲大神助順殲除其衆今得義和神拳礮火不傷則大悅以爲神於是以嚴符切勒五城御史毋得逮捕拳匪益肆自是賊勢蔓延畿輔矣四月楊福同副將爲拳匪戕於涑水政府釋不問各國大震以爲無政堂堂中國縱賊戕官不治禍且及客五月壬寅公使飛電天津飭領事各以兵入衛使館癸卯平明外兵吹笛整旅入城爲數四百有餘載子彈糗餉無數東朝方居

頤和園勅岡煥章周侶樵赴涿州安撫俾勿蠢動周爲刑曹老郎以精刑律歷階至
尙書心薄團匪爲道籙鬼兵旣至涿州匪衆中推大師兄出見趣岡周跪岡蠢蠢屈
膝周方沈吟而岡已引裾使拜大師兄跳跟作勢岡悅而周私以爲醜顧身家念重
且爲岡所劫復命時署名岡後言有驗而東朝信之自是大亂之局遂成

第二十章

拳匪旣得志始試手殺人凡道行提西洋之物如雨蓋之類立取而踐之下令敢燃
洋燈及用洋貨者死無赦於是沿街皆玻璃之屑復命人家設壇焚香夜則潑水於
門外邏取教會之人名曰二毛子縛至南下窪戮之身首旣暴羣犬爭噬家人至無
敢殮取浸至白晝殺人於宣武門內矣仲光居松筠庵久不見修伯符兄弟入城視
之甫入宣武門有車急馳過其側道旁紅巾者五人呼曰止止御者弗省仍鞭其騾
紅巾者出刀進劈御者頭顱立殞於地車中人則衣冠赴驗看者也結舌不能語紅
巾者握其辮髮另出一人斬之刀頓不能入更三刃始殊仲光大怒幾欲出劍顧念

老母又以一身在客則咽其勇氣入白廟胡同伯符兄弟憔悴如蒙重憂見仲光餘怒未息爭相問故仲光以所見語之伯符曰吾亦聞之近欲上書而御史臺不聽入宗人府又弗肯代奏坐聽糜爛只有一死上報列祖遂傾談至晚伯符均以殉國自誓仲光淒然不能答自念戊戌上書格不能進今萬念灰冷且一身未有妻子亦未有官守言責易於處置卽遇變故老母在閩伯兄及季弟左右侍以板輿入居鄉曲定無剽掠之患所念者伯符良友誓天自殉決踐其言又念古梅父女羈身此間妻病又不得去果美人不幸身墜虜中則亦不能不加救護思至此萬念潮湧而初月已上槐樹庵中景物淒清方思以杯酒自慰愁抱忽聞有幽慘悠長之聲呼曰撥水也焚香也庵中僧徒卽紛紛爭出香蠟陳於門次匪十餘衆執刀加紅兜肚裹紅巾復以紅布爲膝衣逐隊高呼而過月色慘淡仲光心疑淪於鬼鄉六月辛亥喧傳乘輿自頤和園入京衆以爲團匪之殺人或弭矣顧乃加甚是日政府奉勅言殺人者皆僞團真團決不爲此至云關僞扶正度亦該團所深願也匪衆得此愈熾乃別創

所以殺人之法矣。十三癸卯童錫琛兵至章回匪也。貪財嗜殺甚於團賊。意京師繁夥使館金寶山積行思大掠乘輿既入趣令平匪童笑曰吾安能以兵力殺此老百姓及苦娃娃邪遂潛連團匪及虎衛軍謀攻使館矣。

第二十一章

松筠庵住僧慧月者頗解事恆與仲光論徐鴻儒仲光異之顧不欲常過街市令慧月出偵賊狀團匪奉濟顛濟顛緇流也故亦不戮僧衆又有所謂海乾和尚者亦髡徒慧月每過神壇咸強其頂禮匪中定制凡捕得疑似者趣拜壇下大師兄爲之焚青詞帑灰騰起則無罪否則立斬城中設壇者無慮數百處愚民輿粟輦錢以奉團匪或投身入籍者大師兄叉手於胸授以紅布裹頭聚四五人閉目凝立大師兄禹步稱神附體卽吐沫變色隳突作勢力盡始已然一日不過再練而已筋力已疲或有慊慊不能自舉其軀者而老團則言日可四五練顧亦未見殆讐言耳匪徒日握刃揚矛舉大燾整隊過市而西人已斂避不欲與犯獨東洋人不之恤有杉山久政

者日本書記也。野行過永定門外。團匪曰：是大毛子，可殺也。顧駑笨不靈，一人趨而擁抱其腰，脅衆爭以拳石擊之。杉山能柔術，力與撐拒，然匪來益衆，杉山遂死。匪以爲誅得洋人矣，稱賀跳叫如勝。大敵長歌入城，是夜張德成入都，開正陽門，以肩輿入大內。親貴諸人爭膜拜於輦道間。張德成傲然過其車。張德成者，老團也。初起自山東曹州，名曰義士黨，專以仇殺洋人與教民爲報國。其兵器有刀、槊，而無火炮。初起名曰大刀會。自清廷有辦團之詔旨，乃改名曰義合團。又曰義和團，豎旗曰替天行道。又曰助清滅洋。紮以紅巾，內藏符籙。或有黃巾者，間有紅披挂而黑巾者，名曰黑團。則黃、紅二種人皆側媚，無敢抗禮。咸曰：此種人大有神通。每人自四十歲以下，十歲以上，各抱大刀，露其刃，繫以紅布。遨遊市肆間，其詐人之術，以發火爲長技。以刀槊向人屋上指畫，又向土中作符篆狀，衆齊聲呼曰：照火立發。或云：豫伏人於屋中，施火油以應之。有不驗者，則曰：是不宜燒，故不行吾法。自銜能避鎗礮，或以利劍自斫其支幹，不能斷，亦不見血。其選擇淨地爲壇，拈名之曰團立。大師兄一人主之。

人必茹素。禁不得犯婦人。不得擄財物。有子弟就壇皈依者。則大師兄授以符籙。巾帶自備。必大師兄爲加之。爲之念咒。名曰上法。上法者。仰而臥地。沫被其唇。狀如暈。少須蹶起。向東南叩首無算。於是張目噓氣。縮周身之力。聚於二臂。執刀而舞。法盡。卽委頓。見洋樓。卽燬。呼洋人曰。大毛子。教民曰。二毛子。突前取其頭顱。卽遇鎗砲。亦不之避。彈至立死。其未殊者。羣昇至壇次。面大師兄。大師兄曰。勞倦行蘇醒也。則以刀取其彈。創或弗重。或得生。其創重死者。則大師兄必徧索其身。得一二物。輒曰。是劫人家財物者。死宜矣。日噉三白之飯。夜則席地臥。以苦行自勵。其曰能避鎗礮者。名曰金鐘罩。又取十八歲以下。至十二歲以上之閨女。衣履悉紅。手紅巾。提小紅燈。名曰紅燈罩。言上法後。揚之以箒。卽御雲而升天。若巨星耿於天際。一煽其中。而巨礮音。暗彈格不能出矣。卽兵艦過海上。煽之亦覆。或堅城石室。煽之無不立焚。總旂或畫乾卦。或畫坎卦。八卦弗全。惟坎旂最夥。卽嘉慶時之八卦教也。于康貌爲道學。信之尤篤。於是愨愨東朝。以爲可恃。匪膽益壯。遂合衆於十六日丙辰。進攻使館。

第二十二章

攻使館之前一日匪衆聞政府有所謂真團僞團之別則思刺刦平民無辜者爲邪教一日乘村人廟會悉錄爲囚殲之於市用以示武仲光午後自白廟胡同歸松筠庵忽見宣武門外萬聲喧騰道塞不能通車問故則言今日大師兄誅邪教有所謂皇帝及娘娘者其人爲白蓮教之苗裔誅之則輦轂不亂洋人可平仲光心疑其謬然亦好事立而俟之可半炊許見前導兩大旗上作坎卦當風飄揚二白髯者分執其旗列隊可數百衆咸短刀長槊無一火器兵行逾半見囚車矣敝車可四五乘一乘載數人有三四童子多幼愿可憐中雜以老媪及貧窶之婦有一年少女郎可十七八以髮自覆其面淒咽可憐童子則不知俄頃且死尙探懷中蠶豆食之及第三車衆譁言帝后者至矣帝爲一老翁年可六十外后則媪耳似夫婦衣飾皆類貧家乃不知所謂帝后者何證也車中有一婦人輒問監者將吾到何處去監者不答婦人指懷中尙有未完之履片自云防一遺落異日爲履肆所索無以應也聞者笑且憐

之既至菜市衆乃愈集。仲光以手分人出衆不能當。遂直至檻車之側。見團匪一。一
摘取其人授伍伯清之舊制有殺人之刀數口。名曰大將軍。二將軍。三將軍。妄謬可
笑。柄鐫鬼物。鈴目血齒。狀如噬人。平日藏諸宣武門城樓之上。用乃取之。其伍伯卽
前此殺晚翠及五君子者也。以手近眉際。招囚人跪。嚴繩橫囚口。挽而合。諸髮上引
而長其頸。復以人挽囚臂。中有年少者。拔刀刀鈍。則力舉大呼。跳而斫之。非斬也。打
而斷之也。童子見之大呼。或有暈者。婦人亦然。以次殺十數人。橫尸自仲三元店肆
門外。延長至十餘丈。以外尸皆臥血泊中。狀至奇慘。仲光此時心肺皆爲熱血所沸。
既悲且憤。歸松筠庵。已上燈。天陰雷作。且雨。案上得古梅書。言其夫人病急。召與計
事。仲光不及飯而往。甫入門。大雨如注。既上草堂。周身濡濕。而古梅久不出。但聞其
夫人呻吟之聲。時鉅時微。似不勝楚。已而古梅出。憔悴不堪。言曰。愛女宵來。劉臂矣。
仲光大駭。既問夫人。復問女。公子古梅曰。愛女無恙。荆人可危。老夫失計。北來竟值
世亂。荆人縱使倖生。而外兵瞬息且至。逃將焉往。若在此圍城。聽人蹂躪。老夫死不

瞑目。今以家口託仲光矣。因呼曰梅兒。出面。仲兄。吾家在難。患中。此間初無親串。仲兄仗義。勝于骨肉。後此儘可相見。萬勿拘以形迹。女遲遲始出。似失眠而又痛哭者。然帶雨梨花風神尤艷。此時仲光亦但有舍性命救彼父女。與共死生。初無乞婚之意矣。女曰。外間消息如何。聞老嫗言。連日殺人。確耶。朝廷失政。乃舉天下大勢。託之薛榮宗。郭京一流人。何其偵邪。老母病深。恐旦夕事耳。脫京城一破。玉石俱燼。妹十九之年。別有自裁之法。願以老父屬。兄得歸鄉井。妹一無所憾。仲光奮然曰。外兵頗有節制。不至無禮。唯團匪可惡。蒼不才。願以死力衛妹。一家燼與同燼。然亦必殲十餘賊。始已不能坐聽其辱。古梅太息曰。疾風乃知勁草。仲光義心。豈待亂離始見。雨盛請下榻。吾家鄙意。且欲仲光同居。苟自脫。可以南去。沿路得仲光爲伴。老朽亦足自壯。仲光諾。遂就晚膳。

第二十三章

明日喧傳義和團攻使館矣。古梅仲光皆失色。以爲禍變且立。及外人視公使爲其

全國之望。公使辱。卽國辱。公使死。卽國亡。決不能聽彼妄意屠殺。正徬徨間。高給諫書至。言內廷力主殺使。龍宗華依違其間。隱以人撫慰公使。又不敢與諸人力抗。顧團匪無火器。一至交民巷使館。兵衛悉登屋騎危。注鎗不發。匪至則排鎗一縱。死者如積。虎衛軍及童軍助匪分攻。西東兩面。焚民屋無算。童軍又分其兵隊出海岱門。剽掠行人。間見團匪。亦以鎗殊匪衆。遂舍東攻而西漸矣。今方議攻西什庫。以虎神營助之。虎神者。對羊鬼稱也。虎能制羊。神不畏鬼。此等荒謬之想。均當軸者區畫然。虎神營中人。或患煙癮。狀如乞人。則皆習稱曰虎神。可笑也。二人讀書。竟益憤。是日雨霽。泥塗接天。仲光有西山紅葉手卷。付之裱肆。肆人家虎坊橋。仲光以車取畫。贈梅兒。車經菜市。見昨日所殺之尸。衣盡失。赤身臥淤泥中。尸爲雨霖作異色。有三五囚首喪面之人。以簣收尸。中一女尸。獨不納之。簣抱諸懷中。呼曰乖乖。沿道大笑而去。仲光以爲此輩已全墜畜生之道。不復可目爲人。閉目弗視。驅車過之。自念以生人之身。閱泥犁之獄。所聞所見。皆異人間矣。得畫後。命侍者清檢筆研書籍。多入古。

梅家女所居書居已他徙然尙留書二架且有絹素之屬與書雜置架上時女以母病匆匆不及檢也仲光書案卽在女當日臨窗讀書露其玉簪雲髻處頗自怡悅以爲親近玉人皮置物事後古梅偕梅兒同入梅兒曰屋促無餘地較之諫草堂雅俗殊別然以諫草堂較之塘西草廬却鮮梅花且又無水今屈仲兒居此或且得兄福蔭老母平安託庇爲不鮮矣古梅晒曰此婢子邇來頗解爲酬應語仲光趣問夫人清恙今日如何父女同曰日就綿綴食亦銳減仲光太息不止旣而曰手卷已得敬上妹氏藏之梅兒悅爲展卷以水墨隱約寫獅子窩山路宛轉下趣祕魔岩淡脂點染丹楓枝皆北向梅兒曰仲兄此卷乃肖清暉雖在亂中亦必隨之左右仲光曰如此俗劣筆墨得妹氏鑒賞蒼益用自努勉矣

第二十四章

五月十八日戊午日旰矣人聲大譁市上有刀劍相磨聲仰視火光熊熊燭天仲光方與父女同膳急投箸起人聲囂雜爭湧入宣武門以天主教堂正當門內漸近門

次人乃愈集亦無應援之人叢中一人散髮仗劍以紅巾裹頭當門舞蹈禹步持咒
卽大師兄也比舍居民爭出大呼曰大師兄行法須救我家火星落吾庭除矣室且
立焚奈何大師兄止曰無礙吾已飭神兵守護此大毛子天人所憤吾輩當靜觀其
焦爛仲光遙注洋樓之上火已從下而上黑烟突突自檻中出斗一振爆忽爾大明
第二層危欄之上見歐西女教士數人伸手向空如待天神救護風嚴不辨其聲略
見口吻翕闐而已忽黑烟再冒瞬息不見已而牖隙皆伸出火舌想此女教士燼矣
時但焚教堂一區初不延及鄰屋于是居人咸以爲神同日東城亦火仲光乃趁城
出古梅方徬徨花籬之下仰面望火光仲光至前尙不之覺仲光呼曰先生古梅始
應曰如何仲光曰但燼一教堂聞東城亦火西什庫尙遠正在圍攻蒼防飛彈不欲
近視古梅曰飛彈焉可近也少須梅兒潛步出微語古梅曰老母幸能少睡可勿聲
響以驚之又問仲光曰外間復殺人乎仲光曰焚殺耳較之齒劍爲酷是夜火光達
曉遲明火熄慧月來訪仲光適曉起延坐慧月曰君知昨夕東城之慘變乎東城教

民與平民雜居團匪久悉其行止昨日大縱火取老翁及媪殺之通衢中或數刃始殊每下一刃衆卽譁贊取次戮及小兒自二歲至四五歲無免者或教民見取譁辯不承則取水按拍其額言當立現十字見卽戮之實則蓄殺之心已堅無論其有字與否靡不駢戮橫尸市上步軍統領及五城御史無敢過問京僚中之愚妄者咸曰是忠義之徒而周侶樵亦曰是當縱之殺戮藉是以威洋鬼長官旣倡百口爲和滿朝咸指實有神兵神將以衲觀之京城之禍未艾居士胡不南歸避此兇逆仲光曰古梅先生見留爲伴又其夫人病不能興彼家無親屬吾又單身在此一無所懼卽不行亦無傷慧月旣行仲光亦出見道上團匪復揚旗言將往攻奧國使館矣仲光遷迤至伯符家則左廁中行李書篋已滿似有生客伯符言昨夕外舅聯公仙杏至仲光曰仙杏先生聞名久矣兄之壻於聯氏非吾閩先達橘叟爲媒介耶伯符曰然吾外舅素惡新政尤不直昆南陔近與吾累書辯論亦漸悉祖制之不行于今方將入面諸王導以變法且痛陳外道之不足恃使館之不宜攻仲光曰忠哉先生偉哉

伯符吾恐錮蔽已深斷非一二君子所能爲力究竟甘爲龍比者必不畏刀鋸願先
生壯其膽力天若祚國家或足挽救耳伯符請與仙杏同飯于外仲光辭歸明日爲
二十日庚申大禍作矣團匪結隊燒大柵欄德記洋貨肆又焚屈臣氏藥房下令曰
天神贊助使洋鬼無立錐之地救者有刑初不累及氓庶大師兄步禹咒火火立發
此亦就所聞而記自大柵欄及觀音寺出珠寶市至廊房頭二三巷門框胡同帑巷
子煤市街西河沿西月墻至西荷包巷上撲正陽門樓飛燄入城自棋盤街東交民
巷近城南御河橋一帶直至台基廠肅王府以東至單牌樓三條胡同俱成焦土精
華全竭于是愚民失望錢米之奉絕賊乃漸漸出擄掠戲園旣罷戲子亦爭出分立
擅拈效團匪所爲有旦脚某甲素爲某太史所狎一日太史逢之于道彈以正言甲
怒幾割刃其腹自此道路以目矣

第二十五章

京師大亂者三日此二日中古梅似加十年之老長髯漸白飲食亦減梅兒內侍母

病外慰父憂。玉容亦頗憔悴。然尙佯歡強笑。用慰二親。仲光以匝月不得家書。知洋兵已近。南北音問沮梗。偃臥繩榻。時或撫劍而歎。不知當去殺人。與否。無聊中就書架。取書忽帶出。聚頭一筵。視之。則梅兒所寫紅躑躅。鮮艷欲滴。上有小鳥。以爪取蟲。一翅飄落。蟲尙力掙。而鳥眼怒張。爪亦握固。風致如生。左方則行書填虞美人云。小樓下。卽蘇隄路。多半尋芳去。綠楊仍裊。去年絲。還映繡屏銀字。舊宮詞。尋芳我落詩人後。月上歸來。否鞋痕印得二分。苔笑問。墻西紅杏。待誰開。

下署訪社友姜秋史女士。不值。留題其壁。琴柄倚聲。仲光讀罷。覺萬愁填胸。一一如露華。受日融化。無迹。把筵吟哦不已。古梅似從外間歸。匆匆呼曰。仲光。仲光力藏其筵疾。出問故。古梅曰。吾適自楊醫士家歸。醫言連日爲山妻診脈。尙足。延長至于六月之杪。吾已萬念灰冷。唯大事尙有急于此者。本日德國公使克林德赴總理衙門言事。車至東單牌樓路北。爲人戕殺。電報已達天津。外兵亦適至。坐索大沽砲台勅俞德等分守九門。并諭李鴻荃迅速至京。仲光此時吟誦之心復冷。又覺深愁巨患。

潮上心來與古梅徘徊籬下久久無言忽聞梅兒呼茶老嫗適出古梅趨入仲光亦歸房更出圖扇涵泳其詞又類再舉醇醪沉沉醉睡矣明日爲二十六日丙寅城中喧傳已派臨淮王岡煥章統屬義和團與列強宣戰仲光憤極笑曰此所謂遣斛律明月督鬼兵居前耳不唯敗也適滋笑柄是日匪徒猛攻東交民巷各使館均敗歸虎衛軍旣不得當于西人則偵得京僚之擁貲多者趣劫之京師大亂人人重足一迹而立旦夕莫知死所是夜讀邸抄得直隸總督奏報連日與西人接仗獲勝人心粗安然古梅仲光終謂其未確不卽信也

第二十六章

丁卯降勅徵各省勤王兵無至者獨提督馬裕岡先以一旅至京壬申各國聯軍取東局東局近紫竹林銀圓銅圓諸局均隸焉然城守尙固直督無主以黃牒乞哀於老團是日獨流鎮匪首張德成復至天津散髮衣道帔仗劍用八人肩輿入節署總督長跪迎迓問吉凶張德成傳神語慰勞俞祿且言教堂中有地雷當以法往取之

卽仗劍出隨者萬衆至教堂之外禹步持咒破門入掘果得狀如小箆德成以劍貫之示衆曰此地雷也不爾全城且陷萬衆稱美聲振山嶽是夜德成馳入都進正陽門明日黃蓮聖母至津直督頂禮如禮張德成聖母年三十許龍袞莊嚴傲然徑入衆皆譁駭稱爲仙真時某末弁侍側少年也善浪游竊告人曰此吾所善倡也數月之間何由證仙如此之迅然無學卒不悟其詐亦隨人拜跪墀下直督問天津休咎聖母曰天津不要緊也聲如梨園中旦脚尙有數語亦均效旦脚所言者言之醜態百出直督心知其謬然惕于朝貴淫威亦媚團以自結同時裕威在太原亦慘殺教士婦孺無一免者童子拖腸于地久久乃死是時將相及北方藩鎮如狂如瞽莫審其端而南方互保之約出矣忠誠公劉研莊先生方督三吳知北方糜爛禍且南暨乃與各領事立約彼此互保于是東南二百兆生靈得不罹兵刃者先生力也以上諸事皆慧月告仲光者慧月交遊廣聞見確故仲光轉得述之古梅二人相對長愁仲光尤戚戚于伯符知大勢一渙伯符必死遂往省之道與團匪雜行至時伯符方

與仙杏先生坐語。伯苻爲仲光介紹。見先生。先生年垂六十。疎髯偉貌。方以內閣學士內調。先生喟然曰。世局之幻。乃非所料。老夫行且上疏論之。仲光曰。上下錮蔽已深。左道無濟。史中言之歷歷。然非大人長德言。或弗省。先生曰。老夫寧計成敗。脫不幸。亦拼此老頭顱。不更戴吾頸矣。仲光心訝其非祥。迴顧伯苻。則慘默不作語。時時以手自握。作聲。仲光辭歸。道見兵來甚衆。有人言曰。此鑑軍也。爲李炳原所將者。昨日馬軍門兵已開赴天津矣。仲光立道左待兵過。盡始見炳原。葛袍冠帶。清癯如老書生。仲光固聞其廉心。竊自計破敵非其任也。明日聞洋兵取西局。又明日癸未。聶師程軍大敗于八里台。時聶公惡團匪將取而殲之。政府草制切責公。大憤。又督戰急。故陷敵死。朝臣誣其縱敵。故諭中有殊堪痛恨等語。于是人無戰心。西局以陷。是時台諫噤如寒蟬。古越太常卿袁公遜秋。謂其同鄉吏部左侍郎許公竹園曰。殆矣。吾于五月二十二日曾上一疏不報。今當與公聯名論之。于是上第二疏。請速保護使館。維持大局。又不報。則上第三疏。嚴劾大臣崇信邪術。請旨懲辦。中有大學士于

康素性糊塗罔識利害軍機大臣協辦大學士岡煥章比奸阿匪頑固性成軍機大臣禮部尙書余岫膠執己見愚而自用軍機大臣刑部尙書周侶樵居心狡獪工于逢迎疏入岡大怒二十四日遍召九卿議于合殿官家見許公引手挈許袂言曰今天下數萬萬生靈立見塗炭汝不可不切實言之許公對曰宜先保全公使卽宣戰亦令其下旗生還臨淮王侍側大咤曰許某汝敢引上袂耶岡等諸人羣吠一聲于是許袁二公大禍遂作

第二十七章

袁公疏草至祕乃爲其戚所得古梅與二公爲鄉人遂潛抄以示仲光仲光周遭讀至十餘遍拊案言曰吾且晚送二公于菜市矣古梅愕然問故仲光曰羣奸方以殘殺外人爲忠指斥團匪爲妄舉朝噤聲而二公乃昌言攻之且列此數奸並及童錫珍東朝方倚童爲左右手日防其携貳今以二忠之赤手空拳制彼張牙伸舌之蛇虎在理萬無不敗先生以爲如何者古梅曰官家之意甚善仲光曰官家自戊戌至

此長處瀛台東朝其能聽之耶是日始聞天津已于二十日失守總督退入北倉某
國人用綠氣砲攻城城軍不能堪故至于敗時中外隔絕消息至祕隔四日始聞之
也人心益懼時朝官不告而徙者已十室而九古梅以妻病不能行仲光感古梅義
又心戀玉人不忍寘之凶燼亦毅然請留忽忽交七月初四日矣先二日于侗子沉
極方爲刑部侍郎獨騎至刑部大呼奉勅出片紙則袁許二公名立命緹騎逮人二
公初不相聞及下獄始相見袁公激昂慷慨許公則雍容若無事初四日沉極復奉
東朝旨至刑部咆哮于公堂之上立促縛人承值司官爲卓君孝馥進而言曰侍郎
固奉勅然已飛飭員役供應咄嗟至矣沉極仍跳叫不已卓君知其狂謬聽之不復
語少須人集出許公獄中許公徐問左右曰今日盡職者尙有何人左右曰袁公耳
許公無言謂沉極曰伏法誠甘唯吾在外部中尙有交涉未了之案一旦身首異處
恐後此洋人不承前諾今請筆墨書某某藏案及外人文件可備後人檢覈者然後
就刑亦罪臣所以報國也沉極初不許可然格於衆議始允許公徐書其日從容如

平時識者皆爲悲涕。及袁公出神采，毅然衣冠，既竟遂就東市。刑部司員列案於布肆之前，上結草蓬，點名後望闕謝恩。袁公肥伍伯相視曰：「恐砍不斷，奈何？」於是商度舉其最有力者執刃。二公既歸，神天地變色，白日欲歛，實則皆傷心人。目中所見者也是日。仲光不出，但聞人言述二公死狀。古梅以鄉誼欲出臨，梅兒力挽其袖，言曰：「世局至此已無可言。母病方篤，老父徒增傷心。梅兒將何恃也？藏酒尙多，胡不與仲兄少飲，破此深愁。」古梅曰：「人言酒以消愁，妄也。須知愁人酒淚多於醒時。故里迢迢，老妻復在，旦夕吾父女相依爲命，固也。何因累及仲光？仲光曰：「凡人莫不有死死爲知己，甘耳下走一身，本無所怯。先生愛我，故不敢獨身遠禍。且津沽洋兵雲集，近畿羣盜如毛。夫人旣不得行，百事聽之天命。且下走心中人尙有伯苻兄弟，料洋兵必勝左道，必無濟乘輿。但有西幸之一舉，伯苻愚忠脫不隨扈，必且自裁。下走昨日復至其家，夫人竊以人告走，伯苻兄弟咸挾手鎗於懷，萬不爲敵所辱，且備有人格之勿死，則以鎗相向伯苻，自誓萬不爲吳梅村所謂沉吟不斷草間偷活也。古梅無言。」

梅兒已令老嫗設醴于案。于是彼此舉杯。仲光自念學劍數年。或此去殺人。不遠矣。思極膽壯。連舉十巨觥。似已微醺。忽謂古梅曰。先生重蒼蒼。有背人之技。不敢自陳。今日酒酣。請一試之。古梅愕然曰。仲光詩畫文章。老夫皆已見。此外尙有絕藝。尤宜承教。仲光曰。劍耳。古梅大駭曰。仲光溫文如不勝衣。乃能劍乎。鬱伊至此。請出一洩胸中不平之氣。仲光如言。出劍。月光已上。照耀庭墀。如畫。仲光以蠲師所授者。更百變其法。但覺寒光上下。如水影作圓紋。倒浸壁間。又如急雨將來。電光四閃。梅兒玉顏微展。歎息不止。語其父曰。仲兄才兼文武。寧可多得。意至欣悅。古梅此時忽有所思。久久無言。既乃喜形于色。曰。得之矣。梅兒聞言。疑其老父誤會。已意翩然。遽入此時。仲光收劍。不見梅兒。以爲惡。其儉楚轉怏怏。無復聊賴。古梅曰。將來能曲全性命。不落兇人之手者。或仰託仲光矣。于是復飲。夜闌始罷。

第二十八章

平明。慧月復來。仲光以昨夕猛飲。頗病。酒不能早起。聞慧月至。始著衣出。慧月曰。先

生似未解宿醒。宵來又豪飲矣。仲光曰：連日聞東城虎衛軍有搶掠之信，其幸未至此者。斜街近皮庫營地頗荒寒，賊或不留意耳。慧月曰：上月十九日，拳匪入都，統慶興家殺老穉數人，劫掠珍物，幸獲得五人正法。然匪中至不平，稱屈不止。且南下窪及西城根均拳匪拋尸之所，名曰戕教，實快其睚眦之仇。我輩性命悉懸彼鋒刃之下。仲光笑曰：賊殺人易殺，爾仲光非易彼恃刀逞蠻，又不解用手鎗，烏能敵我劍術。計南來得劍數年，未嘗一試，今或且試之。蠢驢蒼不敢欺。慧師三十人見困，不爲卻也。慧月合掌稱曰：願佛天庇居士不逢此阨。獸血豈可污君寶劍。仲光大笑曰：古人不言陸剽犀象，耶獸血何污也。自癸卯殺袁許二公後，朝廷日以嚴符趣馬裕岡、張夏萬英諸軍與聯軍搏戰，遂無暇及于羅織。然羣奸聚謀，仍思以廷旨趣李鴻荃入覲，殺之用快其意。張英帆方在貶所，亦馳傳取其首。張雖以他途進，然能詩善畫，頗工駢文。旣蒞貶所，日事詩酒，且收藏書畫甚富。矯旨旣至，有司不敢徑告，預戒伍伯之良者伏於帷後，則大置酒。張樂延張飲，酒半出旨示張。張讀竟，夷然曰：今日可云。

離筵吾久居此亦倦魂魄或能歸鄉井耳乃豪飲無算既而主人請起易衣冠謝恩遂罷酒張入室甫舉帷而刀已出自喉斷頸頭已飛擲庭墀此著蓋出張所不意也時政府之意凡能與洋人言及平日在總理衙門理外交者皆殲之以爲二毛嗜殺之心蓋出乎天性也辛亥天津警報至張夏萬英之兵與洋兵戰于河西務大敗退保南苑京城戒嚴於是思李鴻荃授以全權大臣與聯軍媾和先是養心殿召對羣臣端王臨淮王蘭公岡煥章及崇武清諸人皆痛哭言非戰不足以圖存皆承迎端王之意時端王子方立王幾總百揆衆皆阿附朝議以徐潤義聯源栗三前赴各外國使館止洋兵勿至咸不得當聯公尤切言開釁之非計有雞犬不留之語徐無言栗三亦言義和團之不足恃與臨淮王忤端王以爲三人咸有外心趣立斬東朝無如何也

第二十九章

聯仙杏先生凡四女長字伯苻次字仲苻其餘二女未字也既寓伯苻家冰玉至相

能旦夕長愁。均以國事爲急。先生旣自使館歸。謂伯苻曰。事亟矣。余至東交民巷。幾不得入。公使對余言。西兵旦夕至。館中備嚴。亦不汝畏。堂堂中國。乃謀殺使者。挑釁於列國。此斐洲野蠻之所無者。而中國行之。今事迫。欲求弭禍。請吾輩止西兵勿前。然則使者當束手待死。耶。不惟無謀。而且愚陋極矣。余懼此奇辱。奮不欲生。而岡煥章諸人蠢蠢如病風之狗。遇人輒噬。自度吾禍亦不遠矣。伯苻仲苻夫人爭出慰問。於是家人集飯。而先生心動不自止。卽曰。余心蕩恐不及明日矣。卽部勒家政。署遺囑。伯苻夫人泣不可仰。坐對嗚咽。至四更始寢。甫遲明。聞叩門聲。至厲。伯苻家奴啞子也。奔至寢門之外。牙牙跳叫。伯苻心知有異。卽起啓關。則啞奴方作勢。似云。門外人多也。已而緹騎果集庭樹之下。鐺鐺之聲鏘然大呼。逮人仙杏先生曰。逮我耳。與吾二婿無與。結襪甫竟。未及掩其襟。緹騎已加鐵索引而出。門外停破車。納先生車中。轆轤然譁噪而行。鄰右大震。爭出問故。方知端王下教。取學士也。是日同立。徐二人斬於西市。時張方二軍旣敗。鑑軍亦潰於楊村。李炳原無策。退守張家灣。自縊而

死京師大亂命京堂分守九門以沙囊積城下稽查行人出入時京僚已空留者或愛新覺羅氏及貧病不得去者人人爭以貂裘及珍貴之物寄諸典肆以爲可恃而團匪竟肆焚奪雖臨淮王之狂暴岡煥章之殘忍亦不敢出禁團匪乃縱其所爲乘輿則宿駕以圖西幸市上寂無人行是日古梅夫人已彌留梅兒痛哭幾成淚人古梅日呼仲光爲伴卽曰荆人倘有不幸老夫當仍伸前約以梅兒奉箕帚惟此際匆勿不宜明白宣示仲光妹之可也仲光遂下拜言曰蒙丈不鄙貧薄齒及窶人今已成骨肉之親亡親所遺玉佩敬以爲聘古梅曰老夫乃無物奉酬仲光曰有之前閱書架上有女公子畫扇一具婿讀其詞畫愛不忍釋今仍存架上能否以此爲報古梅曰此幸非私相授受者卽以此報可爾余前六日已購一櫺今山妻已不可救不如昇來以俟後園尙有餘地可以淺殯事定再發扶之回南亦無不可仲光曰諾卽出赴梳廠授以六十金匆匆昇歸漏三下夫人遂逝梅兒累醒累暈古梅呼曰仲婿此若妻也汝不能更拘禮法趣救吾女爲急吾料量衣衾立下殮矣仲光不得已進

抱梅兒梅兒臥仲光懷中久久不卽醒然髮香沁入仲光腦際膚膩如脂仲光此時悲勝於喜防其沈綴不起時按其脈尙躍躍然少須似微有覺卽寘之溫榻之上進助古梅小殮已而棺蓋而梅兒始漸漸微呻仲光不敢復前命備鋤之屬昇棺入後園大槐樹下殮之是夜梅兒蘇覓母棺不得復大痛古梅曰吾已契仲光爲義兒汝今與仲光兄弟耳城陷當出避兵汝且料量應須之物吾已清檢屋中物事託之居停彭君彭君故長者可恃幸爾母棺已殮後園槐樹之下矣女悲號曰娘也兒去娘何依脫賊至殘吾母棺者將奈何天平麗瓊事母何罪乃罰我如是酷也仲光亦大悲進曰妹氏日中暈至三時許天相幸不死今日晚當出走脫更病者寧非更促老人之憂阿兄已拜膝前生死與老人及妹氏共之聞密雲諸縣尙無賊踪潛相大局再定行止夜中燭光熒熒古梅已移梅兒於他室守以老嫗古梅則宿於廳事上仲光歸寢且慰且憂慰得賢助憂則亡國耳

七月十九日戊午夜東洋兵由東便門跨越入城是日團匪尙圍攻交民巷及聞兵入則四散伏匿咸投紅巾於溝澮中圍溷亦滿庚申外兵入內城人家爭閉戶不出修伯符家白廟胡同門小垣低洋兵所不屬意顧其世父寶振甫侍郎門閥宏壯與小屋通寶振甫先生有二女長曰婉如次日淑如長二十餘歲次乃九歲伯符仁愛講道學弟妹咸事以父禮不敢齒爲兄弟婉如恆就伯符受經伯符抗顏爲師爲婉如講解經義妻亦賢淑始者竹葆先生典試閩中于九姓船中得姬人某氏先生平日伉直立朝旣買妾防爲人彈覈乃自行檢舉得旨罷職家居方寶疏入時寶鏊方當國軍機中讀先生檢舉疏呼曰好男子時李高陽同值問曰何也寶曰吾素言竹葆者酒色徒也公恆以爲好男子今何如好男子所爲固如是乎高陽讀旣亦呼曰任過不欺真好男子寶大忤于是與高陽構釁先生旣家居月必數游西山積詩高可隱人仲光鑄龍志初曾爲梓行者先生逝旣數年伯符服闋得翰林戊戌以後杜門不出心知羣邪柄國無意進取聯仙杏之凶禍伯符以爲己實構之俾其外舅臨

老死于非命死志遂決逐日聞城外兵耗及城中殺人切齒握固奮不欲生及聞城破洋兵已入即自調藥合家人飲之時仙杏先生長子序東進曰妹婿殉國吾不敢力諫惟諸甥幼穉乞逮其命伯苻曰可即問仲苻曰汝意云何仲苻曰地老天荒求生無謂續見婉如挾其妹奔入曰洋兵至西院矣伯苻曰吾不能辱趣進藥于是猛飲盡一器仲苻亦取飲尙有二器婉如既自盡一器呼淑如進提其耳灌之餘瀝在器侍婢龍兒進曰女奴能否可與死數伯苻笑曰可龍兒遂仰其餘瀝時家人皆集東院小屋中而洋兵窮搜西院不得金錢取便溺之器覆之庭除以爲婦女恆擲金銀于糞中既而不得乃去東院獲全然伯苻乃不之知藥力久未發則作絕命三首託其先人詩文稿于華太史又不能死伯苻曰縊也仲弟爲我結繩于是飲藥之五人咸至西舍伯苻首登橈就縊橈翻而繩亦絕仲苻至鎮定再結一縷伯苻趣登立殊于是婉如淑如龍兒以次縊皆殊仲苻解而下之陳諸別榻然後仲苻結巨縷于門長笑衲首縊中立殊家人聚哭一時不得棺有某公義之貸百金市得薄槨五具

喝葬於後圃時仲光與伯苻家消息隔斷凡此皆事後始審也

第三十一章

嗟夫天下固有死同而心異者則于康家也于氏以僞道學愚其徒侶平時偶講學皆膚淺可笑一日聚生徒講陰陽動靜之理乃以几爲喻曰几之面陽也几之腹陰也置几靜也移几動也或有失笑於座者平日於舉趾間皆加意鎮定某相國恆語人試觀吾師行步之間皆有學問昆南陔爲其門生以其言新學幾欲取而殺之至令門者不爲通刺門臨使館乃嚴閉弗開出入皆啓後戶尤惡官家之講新政東宮既立力主內禪龍宗華幾爲所動幸忠誠自三吳飛電止之于康既鬱鬱不伸其志於是崇信團匪殲旃外人意勝後可以傾官家而岡煥章以言事幾爲官家飛研所中故二人積憾遂構成此禍及聞洋兵入城知必無幸乃約其子縊以殉國其子謬許之爲其父加纆父子對立迨其父既死其子去纆潛下得不死因以蟒服裹尸葬之小池之上倫常之變至此極矣後其子及余岫以西人索取罪魁斬於菜市卽當

日許袁兩先生死處。或云害賢之報。外史氏則謂之叛子。其斬頭瀝血。尙爲幸也。崇武清者。承恩公也。平時以清廉自勵。頗稱端人。及爲于康諸人煽動。而出經濟。旣非所長。遂亦顛倒錯謬。拂亂所爲。洋兵入城。自裁於家。其子慙而傲。放挖數穴於後園。生瘞其母。後亦舉家自盡。嗚呼。以不學之身。行此古今不經見之事。忠臣耶。孝子耶。外史氏不敢加以定論。想識者自能定之耳。

第三十二章

外史氏曰。京城旣破。八國聯軍長驅直入。千頭萬緒。從何着筆。此書固以邴仲光爲緯。然全城鼎沸。而邴氏閉門於窮巷。若一一皆貫以邴氏。則事有不涉於京城者。卽京城之廣。爲邴氏所不見者。如何着筆。今敬告讀者。凡小說家言。若無徵實。則稗官不足以供史料。若一味徵實。則自有正史可稽。如此離奇之世局。若不借一人爲貫串而下。則有目無綱。非稗官體也。今暫假史家編年之法。略記此時大略。及歸到邴仲光時。再以仲光爲緯。也是夜。洋兵卽入東朝。及官家匆匆出走。隨扈者。但有倫公。

提督宋柱珊以所部追及乘輿。於是神機虎神八旗練軍皆隨扈。李璫不離左右。官家出時他無所挈。手一金塗小合。倫公同車。不知所寶何物。嘿不敢問。既過昌平官家起。旋授合於倫公。微啓之。則小棗十餘枚。餽餽二而已。倫公大悲。已而馳驅近懷來縣。縣官倉卒出迎。跪於道左。東朝及官家入署。縣官孺人跪迎。東朝命起曰。爾且爲余理髮。余飢矣。趣進食。孺人奏曰。小邑鄙陋。與供御者大別。敢昧死以常食進。東朝曰。可。乃進湯餅。東朝御之。至甘。謂孺人曰。汝言常食。乃大官中所不能治。廚下何姓。余將挈之。西狩。俾日爲余治湯餅也。丙寅。駐蹕宣化。龍宗華亦抵行。在樞臣先後咸集。獨岡煥章道病泄不止。夜臥輒見鬼物。掎擊其躬。未幾死。外史氏曰。甚哉天道之不可知也。庚子。全局之糜爛。係諸岡煥章一人。陰納賄而外。矯廉。幾欲盡殲漢種。且痛斥孔子爲非人。用人以目。不識丁爲第一。稍識字者次之。通人爲下。而不識丁者尤以滿人爲上。常曰。漢人肥。卽滿人瘦。瞽惑東朝。且欲甘心於官家。雖爲成濟。無恤也。生平所崇信者。封神傳。濟公傳。七俠五義。諸書。猶必待人講論。始悉。既秉大權。

故奉義和團爲神仙一以說部中所言者爲科律朝士憚其勢燄違心附和以訖於
敗迨乘輿西狩自知罪惡稔厚不逃靈誅憂鬱成病以死其所云見鬼者非鬼蓋陷
戮忠良臨死腦動還其平日之氣知殺人非法故有是言然而漏此元惡不授首於
東市令讀史者遺恨於無窮矣八月乙亥乘輿至山西大同府丙戌至太原府以撫
署爲行宮庚寅勅廷穆護理直隸總督岑西齡以封疆大臣荷鎗宿衛旦夕立行宮
門外出入必稽夜亦席薦宮門枕鎗而臥東朝官家咸以爲忠擬大用之顧岑公以
侃直自命羣小忌之龍宗華心弗善也乙酉乘輿入潼關降香於華嶽廟壬申至西
安駐蹕以北院爲行宮時嶺南辛公海奔赴行在朝紳亦續續至壬辰和相國年屆
八十亦至朝廷粗立一日辛海入覲痛陳東宮之立非天下之望且言端王傾邪誤
國黨結羣小致乘輿西狩各國以端王之故必株聯於東宮與其見劫列強而廢儲
貳不如出自朝廷之意爲正大旣足以弭列強之要求亦足以平天下之觖望東朝
大駭然亦意動卽曰汝與龍宗華商之時官家不言惕於東朝不敢言也是後東宮

之廢外人咸不知出自辛公識者以爲辛公識大體也是時端王失權龍宗華獨相

第三十三章

昔者西人哈葛德有言爲小說者最有權力筆之所嚮能使讀者眼光隨筆而趨今
吾書繞叙到北京矣八國中唯甲國丙國戊國爲文明乙國狃於北方之習頗有侵
掠丁國則以殺使之故大仇在抱故其遇華人至酷八國旣分界而丁國界內遷徙
入于丙界者至夥仲光所居者正屬丙國保護仲光歎曰吾忝然男子乃託庇於外
人耶此間又安可居是時戊國以兵守大內不敢闖入以故宮中積金及法物咸未
損則不能不稱戊國之文明也各國旣以理藩院爲會議公所首下令取余岫及于
康康死乃囚其子沉極意合端王臨淮蘭公岡煥章周侶樵諸人同誅於市以謝各
國顧聞岡于皆前死則仍坐索諸人並議以兵趣西安時以李鴻荃爲全權大臣入
京議和戊國以兵衛之居賢良寺於是各國西趣之鋒弭然尙議瓜分甲國丙國不
可而止顧分界之兵紀律雖嚴而團匪復變其宗旨投入各國爲奴間導其不肖者

稍出劫掠禁城以內盜剽日甚各國復議既已聽講而地面事不如仍以華治華乃移檄聽五城御史行法但須稟承各國政府而已時陳鈺主南城執法甚嚴日縛惡少十餘人於市戮之以牒告理藩院公所人得粗安然朝官之留京者仍續續出仲光與古梅議不如趁此暫出居三河縣聞彼間尙寧謐前云密雲者與懷柔縣至邇聞懷柔土匪戕殺知縣焦立奎並其眷口幕賓皆盡京官往避亂亦多遇害三河縣爲蒼鄉人能部勒其卒伍逮捕劫掠者似可依也此間偶一出戶爲丁國所得將受奇辱不如暫避俾少寧謐南歸未晚也古梅自喪妻後以愛女得人又日見仲光行事忠謹雖已定聘每遇梅兒必持禮防未嘗少雜遊語卽有議論舍詩書填詞外無他語古梅稱頌不已覺身困圍城日但以鹽豉雜粗糲而食而貌日加豐梅兒雖未得受聘消息見仲光之事其父如嚴君動息稟承心亦異之自計母亡父老又屬衰宗雖有薄田而劉宗不可無嗣族兄固審慎然南北隔斷不審草堂中書籍曾否散失又微聞浙中西安縣有戕殺之事至將縣官鬻割杭州有無變故不可

知也。仲光已拜嚴君膝下。雖屬異姓。情逾骨肉。母氏生時。曾聞有却婚之信。固是老母深恩。戀兒母。今已矣。脫老父有不諱者。兒何屬也。思極。泫然。忽見老父與仲光同入。仲光曰。適商之阿翁。八國已分界。居人至不能得菜蔬。鄙意暫出三河。居友人鄭公轄下。聞鄭公能捕盜。或得粗安。今往東便門。以輕裝出。此間物事。暫付居停。妹請檢可挾持。同行者。兄當出而戒車。梅兒曰。異鄉逢難。得兄仗義。關垂老父。並及先母之喪。感何可言。沿路有無盜剽。與其輕身觸險。不如仍居此間。惟仲兄酌之。古梅曰。吾不能鬱鬱居此。嚮非爾母病不能興。久已出矣。梅兒聞及亡母。卽流涕曰。舉家皆出。拋吾亡母。殯宮與老槐相嚮。秋風已動。落葉滿墀。母魄有知。能無淒愴。仲光及古梅皆爲酸鼻。古梅忽失聲曰。吾性命託仲婿矣。梅兒大駭。古梅卽改口曰。吾託仲光也。仲光此時不敢更出一語。但曰。蒼先出戒車。車二輛。老人與妹氏同行。蒼專車爲導也。

第三十四章

既近三河界之夏店鎮渡橋入泥窪鋪時土匪焚掠已過村墟無人兩車輾輻行至大林之下已交下午矣林中隱隱有十餘衆或起或行或坐仲光迴顧後車語古梅曰此間略有異必爲盜鄉古梅未及答梅兒疾言曰仲光幸勿殺人能少懲足過吾車足矣蓋聞其父呼婿覺終身之託已定此時之對仲光別有一種深情此女兒恆態也夫以仲光年少學養皆優文武兼備又澹于榮利仗義多情梅兒烏能不戀于心且相處日久患難無變梅兒尤極感激又知賊不足慮其令勿殺人者親愛防其傷人道也凡此皆外史氏臆度之詞或梅兒本意初不如是亦未可定方仲光發聲時賊已陸續出可三十餘人卽草間出長槊或大刀立而言曰來車必二毛子當下車至壇上焚符灰起者免死不則祖師不寬汝地上也仲光笑曰鼠子汝言能滅洋何乃反爲洋所滅今將混戰耶抑選鋒而鬪中有執槊最巨者出曰勿須多人老子足以了汝仲光曰可卽下車出劍古梅失色力防仲光有失梅兒曰翁毋憂仲兄閒暇如此必能辦賊語次仲光已近賊賊挺槊猛刺古梅凝視槊鋒正向仲光胸際仲

光忽瞥在賊後劍起賊之頭巾並髮皆斷賊大怒方握槊反刺咄嗟間槊斷于是叢中突出三槊並嚮仲光仲光忽騰起數尺身在三槊之上引劍下斫三槊立時同斷斷髮之賊渠復奪得他槊刺仲光仲光左手忽奪其槊引劍沿槊柄而過賊渠將指落仲光奪得其槊插地深可二尺語賊曰藝高者來試賊渠失指負痛而罵詈仲光大笑曰以竹鞭犬我笑而汝吠宜哉賊渠與衆耳語于是大進圍仲光仲光此時面目亡失大呼陷陣古梅驅車稍遠但見仲光劍光上下每下必斷一槊賊或斷指或割耳俄頃間三十餘人皆辟易嘯引而退不戮一人忽見有賣油者健步而過虬髯海口屢目仲光仲光亦不之省徐步就古梅初不喘息古梅慰勞至再問可行否仲光曰行也何懼梅兒忽啓櫻唇將欲有言復止仲光曰適遵妹言不欲殺戮留此憮狷之衆後將越人于貨矣然賊斷指者無數宜可少懲梅兒驚定言曰賊謂兄雅步易與耳兄適在百忙中忽以王荆公字說爲調諷妹滋服阿兄鎮定仲光曰承妹氏獎借深以爲媿于是復登車行既至三河覓得逆旅時已薄暮遂不更謁鄭公明日

仲光以刺入鄭公出見仲光述道中遇賊事鄭公曰良然此間多伏莽吾即用賊渠爲遊徼故盜風稍弭不圖乃復行刦于野明日當爲仲光治之堅留小飲而出逾二日鄭公以柬速仲光入言曰取得斷指賊矣吾臨堂皇兄可自座後觀之縣役以鐵繩縮五賊皆以布裹手鄭公問曰爾五人何由同有創手之病賊吃吃不能答鄭公曰延邴公出仲光出鄭公起立言曰仲光先生此創手者是乎仲光面賊渠笑曰爾斷指曾就醫藥否盜皆稽顙自承仲光曰京畿已亂何人非盜爲盜者寧止此數人僕飽嘗世變萬念皆空婦人之仁吾之所恥若干他人之柄作爲威福視人命如草菅吾尤不忍此事鄭公自有令甲客子不敢與聞一揖而退鄭公感仲光言乃立判五人永遠幽禁仲光歸述之古梅父女皆歎息仲光以逆旅湫隘且溼當卜宅于野次于是去縣二里相得一村門臨小河支板爲橋時已秋初臨水垂楊微有憔悴之色幸草舍尙精潔圍以小籬行李無多以夾室居梅兒古梅與仲光同居一室古梅暇輒野行而梅兒旣同經患難亦知後此決屬身于仲光日來細察老親詞氣其待

仲光日加親稔。若爲假父。乾兒。決無如是情愔也。因亦無復歛避。但謹持禮防而已。古梅者。信仲光深知。婿女皆賢。亦不加防檢。一室之中。彬彬有禮。至于二人眉眼之間。有無流傳情愔。則外史氏不與身其間。亦無從辨矣。一日。仲光甫起。卽聞有人微扣籬扉。出觀其人。似已晤面。突一省記。卽破賊時所遇賣油者也。虬髯蓬蓬然相見。不作他語。但曰。足下劍術似出少林。得毋爲蠲師弟子耶。仲光大驚。問客何以知之。虬髯者笑曰。蠲師獨不與足下言。有王王者。曾經受業者耶。仲光大悟曰。然。然。君我同門耳。肅客入座。王壬至。忼爽言。一身淪落。不事生產。自經世亂。無可圖生。因以賣油自活。此間多綠林豪士。咸耳己名。因多在門下。己以正言約束之前。此劇盜路剽皆外來者。本欲助君。因見君劍法高。力敗三十餘人。能不傷一命。仁勇無敵。尋偵君爲令君上客。不敢入面。及聞遷居于此。故造訪一談。聞彼盜尙欲糾合多人。至此復仇。僕已爲君備之矣。車內有女郎甚美。誰也。仲光失聲曰。山妻耳。旣而卽改口曰。聘而未娶。王壬曰。僕善相人。夫人不惟美也。且有德。足以相君。仲光曰。適言盜至復仇。

當以何時吾早爲備王壬曰三日耳君且自籬中觀宜需君者君出于是談敘甚歡別去草堂旣狹不惟古梅聞之歷歷卽梅兒亦悉聞之始知身已受聘矣自計身爲邴氏之婦吾又何所歛避邴郎旣不明言吾祇合仍以兄事之耳

第三十五章

夜中同膳梅兒較前頗踈踏于座仲光知之低頭不敢正視膳罷歸房古梅隨入語曰仲婿三日之期促矣此王壬者何人其言足信否仲光曰信蠲師當日曾語蒼以其人蠲師先覺人也果有休咎必前示師乃未言王壬之不善決無事且蠲師善知人匪類必不薦寵丈勿戚戚于心也時逾三日日中仍無事薄暮時梅兒呼曰仲兄句久久無言仲光笑曰妹殆謂賊將以今夕至耶梅兒不即答又久乃言曰仲兄當審慎彼卷土重來未必不聘能者仲光曰不敢奉欺蠲師劍術神以口訣見示卽不敢自詡然決無事矧有壬壬相助決無他謬二更向盡籬外聞有十餘足音復聞有鐵繩聲似有物觸刃而刃落者又聞呼詈聲卽聞此十餘足音向北而趨始聞有人

大聲呼曰驢汝乃不識濰縣王老鐵耶更來者殆矣已而萬聲都寂仲光疾出開門視之闔無一人但見遺刀地上而已仲光入曰王兄破賊彼亦知妹意不欲殺人特小創之而去蠲師言彼學鐵椎以聲度之椎巨觸刃故刃應手落梅兒曰此事大類小說妹讀魏叔子大鐵椎傳自謂必無其事不圖今日乃在隱約中得其人矣古梅曰文人好囂張宋濂之秦士錄寧有其人叔子大鐵椎亦步其後塵耳即如今日王壬之事後來觀者亦不過視爲小說之寓言于是大笑時爲八月秋氣已深京畿一帶均洋兵纏屬于道楊村之民尤蠢蠢好仇殺因團匪起事則大喜于是取教民家至于無少長皆斬分肥其物其幸不死者愬之洋員于是聯軍至楊村縱火大焚其居逃匿稍後者亦罹于礮火一望赤地而涿州去京尙遙團匪之燄仍熾聯軍出一旅攻之已立敗壬子乙國遊騎至保定城下廷穆方假節署制府從官咸不欲戰乃揚龍旂于城堞之上開城納聯軍各國咸飭將校率兵入城主教某訟廷穆戕教及臬司沈家杰聯軍諸將大怒開軍事審判參將黃某蓋手刃教民者也聯軍取鞫于

堂下黃出廷穆檄書謂發縱指示者制軍我乃奉行文書而已廷穆語塞復取沈家杰詰責所以戕教之故以詞氣一忤言我衛教不戕教也聯軍取主教證對主教力指其罪沈曰妄也我決不戕教且以力衛之聯軍諸將曰于何取證沈曰吾卽證之以主教之身主教今日所以得生能訟我于聯軍審判之堂即我保衛之力我若不衛主教久已爲亂民所殺矣何能留此完全之軀命而訟我此卽我所以衛主教也諸將咸以爲然得不坐乃定廷穆死刑廷穆滿洲人恂恂孝友能書畫藏楊椒山手迹及王石谷臨安山色圖畫筆清雅第少魄力爲人亦溫煦可親與沈家杰友善顧無斷爲岡煥章諸人所刦俞祿死後遂代爲直隸總督以奉岡檄書殺教取媚遂及于禍識者憐之

第三十六章

廷穆之罪既定諸聯軍之爰書丁巳出而斬之令廷穆具朝衣朝冠以印兵擁衛出東市沈家杰亦如之顧乃不殺人民觀者如堵頗有太息泣下者廷穆過市憤極取

冠擲于道旁茶肆中。印度兵以槍向之。侍者復取冠加其首。既至刑所。泣謂沈家杰曰。吾歷官數十年。初未剝取民之脂膏。今臂上縛有銀帖三萬兩。爲老母饘粥之供。我死乞兄將付老母。嚴飭家人勿言我被慘禍。防老母悲也。沈泣不可仰。因取青巾。言曰。司裏無以報大帥。請以此青巾蔽目。可以安穩歸神。廷穆不語。聯軍飭華人下刃。衆皆相視莫發。廷穆不能耐。復自褫其巾。謂平日所善一壯士曰。汝爲吾部曲事。既至此。趣爲吾了之。勿濡時日。于是盡于東市之上。外史氏曰。廷穆之死人爭惜之。吾獨恨其無斷戕教死也。卽不戕教亦死。當就鞫時。若能慷慨肆罵。則尙爲長白之英雄。外人尙勇。或稱中華之有人物。但觀沈家杰能辯。竟得保其首領。廷穆之所以遜于沈者。卽寡讀書與見理味耳。廷穆既死。沈得無事歸。聯軍審判所忽懸一牌示。大書曰。沈家杰著革職。永不敘用。並驅逐回籍。觀者大笑。聯軍蓋效中國官府口吻。用是作遊戲。君子頗引以爲悲且辱也。同時道員談文輝亦爲聯軍戮于津門北塘礮臺。亦爲聯軍所有。時洋兵與團匪分據各州縣。洋兵所至。團匪之燄立熠。其駢戮。

者亦續續于道。當此之時，李鴻荃居京師，定和議，各國以李重望咸歛其鋒，而丁國以殺使之恨，丁皇帝推轂拜瓦德西爲大將，以精兵東發復仇。用此之故，和議中梗，聯軍諸將亦坐待瓦至判決。時列強中以丁國之陸軍最精，且夥，京中人庶頗重足一迹，而虞禍幸五城御史尙得人安輯閭巷，于是流亡稍有歸者。九月庚寅，東朝官家自西安下諭懲禍首。時聯軍意屬端王及蘭公，二者皆近支，密旨飭李鴻荃力爭。聯軍諸將重違其請，釋二人弗治。然當鐫去玉牒黜爲氓庶，且長流不聽反。復論童錫琛時童尙擁重兵，東朝虞其叵測，復飭李與聯軍開議得罷職，乃以臨淮周侶樵裕咸、余岫于沉極爲解。余于已就逮于京師，岡煥章于侗已前死，勿論。而周侶樵方隨扈使者宣勅，就其家盡之。周肥碩，飲食兼人，長于刑律，當時頗稱端士，顧身家念重，刦制于岡煥章，乃不敢論團匪短長。外人以爲言朝士頗知其枉，然乘輿在外，不懲禍首和議，莫就。周飲藥不能死，輾轉牀簀，使者坐堂上，趣覆旨不得已，就縊繩絕者再始。殊其師薛殷森老矣，痛哭以爲冤抑。然朝廷無如何也。同時斬裕咸、裕酷吏。

傳中人也。其治山東曹州諸盜慘酷無人理。殺人之法。列長橈。仰縛人頭。足于其上。以力士執堅木爲棒。力棒其腹。腹不任受棒。肺葉塞口而出。尸狀兇獷。目珠盡突。在西安殺教士。雖老穉無免。陝西尊之爲岳武穆者。臨命作生輓聯。識者笑之。臨淮王者。前清八王之後也。與蘭公友善。見說部中如封神演義。以爲法寶破賊。及大小七十二變化。確有其事。惡西人作橫。時圖報復。旣得義和團。謂可資之。排外乃極。力戕殺直言敢諫之士。用堅其信。事敗後。知不爲輿論所容。乃挾妻子西行。館於古廟中。妻子別居。使者至。臨淮出見。使者宣旨。臨淮謝恩。後使者曰。朝廷尙許王作家書。或得面其妻子。王感謝已。而妃挈其二子至。抱膝大哭。王泣曰。汝輩好爲之。勿以祖宗大好河山付諸外人之手。語已入室。使者已預令人爲王結纓。王大喜曰。使者善我。乃從容就縊。外史氏曰。臨淮固王孫中之有勇者。果能不爲惡少積習所中折節。向學。或出洋留學。亦足有爲。乃不學無術。自戕其身。甚哉人之不可以不學也。

第三十七章

九月庚辰瓦德西至整兵自天津趣河西務繞馬家堡入都聯軍推爲總司令官入居儀鸞殿殿在三海之中東朝所常臨幸者也殿華飾爲三海諸殿之冠粉牆皆細鑄作人物珠簾繡幙金碧煥映瓦德西爲丁皇推轂大將又爲鐵丞相舊部與毛將軍故交聯軍諸將咸傾襟推抱以向時有西銀華者名妓也美貌能操丁國語言將軍見之大悅遂同臥起殿中然丁軍得有國主號令頗忤視華人京師琉璃廠藏書夥並爲書畫之肆書賈謀乞哀於西銀華西可其請轉告之將軍于是下令勿蹂躪琉璃廠識者多之瓦將軍旣統諸國聯軍將謀赴西安先以一旅赴長城遇義和團殲之而運河尙有華兵駐紮見丁國兵至亦退往山東丁國復合己庚二國之兵出宣化張家口華兵不能抗乃拔隊盡赴山西京畿一帶官軍與義和團皆盡十月辛未西班牙公使始領銜會同各國與全權大臣定大綱十二條甲戌全權大臣以大綱馳奏行在照准于是和議粗定戊寅得戕害公使克林德之兇某乙爲神機隊長就鞠時神宇不撓斬於菜市觀者如堵牆乙高歌就刑雖西人觀之無不心壯十

二月壬子。勅尙書張伯希爲專使。赴甲國弔唁。並致賀。己未。再懲禍首。諸降革有差。壬戌。開復徐潤。義栗三聯源。原官。癸亥。諭將首禍諸人。從前矯擅各要件。提出銷燬。並下責躬之詔。甘肅提督童錫琛。亦卽於己未。革職。而大學士玉昆。初次奏請。賜恤。在京殉難諸臣。邴仲光。在三河。始聞修伯苻凶耗。縱聲大哭。梅兒大驚。以爲仲光得家書。卽奔集仲光室中。玉容無主。櫻唇盡白。呼曰。仲兄。吾姑句語時。色又大頰吃吃。不能出口。乃曰。得毋兄有家書耶。仲光哭少止。言曰。修伯苻兄弟殉難矣。時古梅外出。梅兒卽上甌茗。置仲光几上。曰。伯苻兄弟忠概渾然。妹早知之。然乘輿尙在西安。禍非亡國。伯苻卽麻鞋行在繼踵。杜陵人豈能以不忠目之。今旣殉節。阿兄契友孤矣。高鑄龍。遠在杭州。林太守方志初。亦久無音問。志初作令桐鄉。有惠政。夙已聞之。然皆遠在天末。卽妹鬱鬱。亦欲南歸耳。患難之中。老父視阿兄如骨肉。妹又纖弱。非兄出死力護我。安能偷生於此方。阿兄與賊并命時。妹心膽皆殫。自問後此句語時。詘然而止。兩顴均作玫瑰之色。髮黑眉青。腮紅櫻赤。一時羞赧之狀。雖以周昉龍眠。

亦不能寫其萬一矣。仲光心悼良友，眼屬嬌妻，一悲一慰，如墜夢寐之中。梅兒日視茗碗，復視仲光，不能更作一語，不期倚身案側，相視無言。仲光知此圍力，當自解卽拭淚，捧甌茗，言曰：謝妹氏見存，然良友之情，安能自是怱然耶？

第三十八章

明年正月三日庚午，得高給諫書，言京師粗定，朝士亦漸歸矣。請古梅移家入都。古梅曰：吾方瘞山妻時，藏金七百兩于殯宮，今歸當發之爲運貲。擬與仲光回南。仲光大悅。是日得伯壽家書，亦自高給諫轉寄而來，言庚子茶市佳，又得數千金。弟病亦愈，母亦康健，事定宜速歸。旣不求官，勿戀戀京師。阿兄與汝階隱耳。于是翁壻乃清檢家具，且行。仲光曰：壻當往訪王老鐵，于是四出覓之，竟不得迹。兆或言賣油王二已出關矣。仲光曰：老鐵踪迹詭祕，令人疑駭，彼恥以救我爲德，故引避耳。嗟夫，蠲師真知人哉。于是以車入京，緣路頗見洋兵，幸不撞擾。旣至舊居，門闔如故，花柳未芽，啓戶積塵，經寸居停。來言間有洋兵入視，見所陳皆書籍，弗視而去。于是再取舊時

老嫗並招歸故僕。汎掃門宇。方匆匆間。仲光不見梅兒。卽謂古梅曰。妹氏安往。古梅曰。是必造後園省母殯宮耳。入視無聲。見梅兒已暈于樹下。翁增。大震。仍仲光抱之。而出。久久始發聲哭。古梅曰。愈矣。仲光曰。妹殊失於調攝。車中勞頓已極。旣未進食。復恣哭。老母脫有清恙。則老人將如何耶。梅兒嗚咽不能答。古梅及仲光再三撫慰。而出。明日。仲光奔赴修伯苻家。望見白廟胡同已嗚咽。不自勝。轉入菜邦小胡同。見伯苻家矣。以手搗門。啞童出應。仲光不及待。其通刺已奔至庭樹之下。號咷大哭。伯苻夫人及一子二女三姪亦同聚樹下而哭。啞童哭聲牙牙然。悲止始問家事。則已易棺瘞于城外。仲光詢伯苻兄弟殉節處。則在西屋門已封鏽。仲光再拜門外。自窺眼內窺家具積疊如山。塵封經寸。仲光曰。嫂夫人宜祀伯苻兄弟及二妹與龍兒牌位。于是間于禮始合。夫人曰。滿洲初無此禮。仲光歎息而起。夫人曰。亡夫死後而姑氏將蠶食我家。此事尙須大累先生也。仲光曰。苟可儗力。敢不盡死。夫人曰。伯苻臨死尙有遺囑及詩。未亡人藏之。篋笥用待先生。仲光曰。請出見示。夫人如言。紙長九

寸寬三寸有五書告華太史曰大事既去侍國破家亡萬無生理老前輩如能奔赴行在敢祈力爲表明侍死于此地此時雖講西學並未降敵家人有不欲死者尙祈量力照拂如死亦聽之外有先人奏疏年譜及平生著作並以奉瀆亦祈量力保全之敢百拜以請匆匆不及走別是爲至感石甫鳴西二弟均此不另絕命詩曰

袞袞諸君膽氣粗竟將血氣喪鴻圖請看國破家亡後到底書生是丈夫

曾蒙殊寵對承明報國無能負此生惟有孤魂凝不散九原夜夜祝中興

薰蕕相雜恨東林黨禍牽連竟陸沉今日海枯看白石二年重謗不傷心

仲光讀已復哭淚溼其紙卽珍重還之夫人夫人曰亡夫于先君子之死自以爲非已數言不至此久欲以身爲殉亦知奔赴行在行尙可達顧羣小仍在君側知事無可爲決計一死自盡其職語時悲不自勝仲光曰詩稿安在夫人曰已封裏藏之巾箱願欲啓箱如發塋兆手顫不能啓鑰仲光曰俟嫂氏悲懷少殺菴當來取嗟夫生平良友僅留此莪莪者寧忍棄之也悲極怏怏而歸

第三十九章

正月初八日乙亥日加卯宣武門菜市。中人已蝟集。言今日廷旨自西安來。徇聯軍之請。懲戎首。斬余岫于沉。極於市。侍者入告仲光。仲光謂古梅曰。戎首固可誅。然出之。聯軍要脅國之恥也。蒼且出觀之。時市上已不能通車。各國聯軍皆攜拍照之走馬機。人手其一。店屋之上。人纍纍然。移時西國兵隊如林。出止市上。柴車二輛。一坐余岫。一坐于沉。極刑部司官以詔旨。卽車中示余岫。余神字鎮定。讀至兩遍。言曰。聖恩。聖恩。殺洋人固我也。旨中所論一無冤抑。請卽就刑。於是下車望闕。叩首扶就刑所。于則昏惘無人色矣。仲光歎曰。余岫雖頑固。終是好男子。于氏逆子。宜其有此態也。歸時已傍午。梅兒曰。仲兄。今日又觀不得意事矣。計自戊戌至此。日聞殺戮朝廷。若不更革。妹恐不日將有爾朱榮河陰之役。奈何。仲光曰。河陰之役。惟得爾朱氏始敢行之。今茲尙無其人。吾聞革命黨人已布東南。少年之留東者。恆痛心疾首于樞近所爲。一夫大呼海內立。且崩析勝廣之禍。不遠矣。兄宦情都盡。甚欲從妹高隱于

秦亭山下地去南漳未遠。蒔花種竹。盡吾一生足矣。梅兒曰：兄獨不思歸閩乎？仲光曰：吾意尙欲迎養老母。梅兒曰：妹亦可以南去一覽閩中風物。外史氏曰：觀此二人之言。似已心照矣。其可以紀之。吾書者均冠冕之詞。須知鄙人之爲此書。非爲言情而設。顧不得仲光夫婦亦無以貫串而成文。或且異時修史得資以爲料。則亂之所自生與禍之未全弭。係屬何人有史識者。固能辨之。至于宮廷幽悶之事。時亦得諸傳聞。未敢據以爲實。亦未便著筆。或且他日私家紀載。稍稍流傳。人間有別足生人。愴喟者。外史氏才力疏薄。不欲用臆度之事。侈爲異聞。讀者當曲諒吾心也。時爲二月。古梅召役人啓樹下之棺。先期將藏金啓出。爲南歸資斧。棺外加以髹漆。令之堅實。因遂移厝於三聖菴。而仲光梅兒日益親稔。似同懷之兄弟。然彼此咸持禮防。言詩詞書畫。及於山水花木。雜以時事。匪所不論。但不言情。一日飯餘。忽得高鑄龍書。仲光大悅。梅兒亦就同觀。其書曰：仲光足下。別僅三年。所歷事變。蓋萬千矣。吾心緒如亂麻。而時局之亂。亦適肖吾之心緒。今與仲光書。教吾將從何處說起。耶。生平契

友惟修伯苻林太守及仲光三人伯苻殉節吾累月後始聞之爲位哭於西湖聞其兩妹一弟及青衣龍兒皆殉何一門忠義之多也仲光與修家密邇必能得其遺稿將來劊劘之事吾自任之尙有不幸之事吾不敢告仲光度仲光此時聞之必又大哭林太守卒矣句仲光讀至此淚如泉湧視書中字字皆有散絲四射於紙上蓋淚漬目睫其作散絲者睫毛被淚光幻爲此狀耳仰天悲歎不更作語梅兒起而淪茗言曰仲光飲此旣又改稱曰仲兄仲光飲茗神志少定復讀其書曰太守素清健自戊戌後長日不怡知大亂必不遠且日盼仲光之來杭又聞仲光入監讀書遂不敢誤仲光進取當昆任之獄越中言新法者咸遁而守舊太守復建一中學堂聞者咋舌而太守一不之恤去年四月以疾卒於署中吾經營其喪後爲方志初招往桐鄉桐人樂志初惠政有召母之稱度仲光聞之必爲少慰所惜者吳竹村爲亂民戕於西安全家幾殉幸留其季子未殺其事迹大類蔣鉛山所編傳奇之桂林霜憶竹村生時好與仲光談禪吾嘗戲稱爲吳邴之禪鬪仲光當必憶之又曾否憶在雲栖月

下蓮池塔邊聞寺僧梵聲竹村曰此真所謂海潮音忽忽四年矣故人物化又多強死獨仲光少年健旺又怏怏不得志願亦知仲光宦情已淡今亂後是否作計南歸聞已與古梅愛女結婚句梅兒觀至此面頰欲避不能欲讀不敢仲光立時收其書起曰鑄龍邇來好作謔浪語妹在南中想未見其人其人與丈有素既又自悔對梅兒不應稱丈然而梅兒默然不作答亦不走避但垂頭以手把其襟角往來拈弄不已此時古梅入曰聞鑄龍有書請以示我仲光出書授古梅讀竟視梅兒微哂梅兒益不能堪強起入內首低于胸仲光目送之但見其螭鱗之領潔白如玉也

第四十章

三月微暄古梅仲光計以洋兵退後作歸計然此時西兵尙分界而守出門非易仲光家居時督侍者以水灌花及柳柳已純青掩映窗戶梅兒時時就內室讀書聲極柔婉爲柳風所振流入仲光耳中不期魂酥而骨醉仲光自念蠲師預言好事多磨願所磨者均身外之事而此心之怡樂寧薄福人所能任耶老母平日讀書著作不

輕示人卽梅兒亦酷似其姑吾自見扇頭虞美人一詞乃不復多見或定情以後再
讀珠玉耳遂伏案作書報鑄龍書末並及梅兒畫扇及填詞書訖忽憶藏扇所在卽
啓小箱篋出扇觀之往來展玩不已忽聞古梅呼往法源寺看丁香匆匆忘懷遺畫
扇于案上而出梅兒知仲光偕父同出不期徐步入仲光書舍迴憶當時伏案作書
自窗眼斗見仲光彼此眼光對射不圖此後身事其人邴郎通膽恢富文武兼長第
未覘其詩筆今趁邴郎外出試一偷翻案上或且得披珠玉入時忽于案上赫然見
己所作之畫扇再檢扇之左方于扇末隙處蠅頭細書燭影搖紅一闋云

樓影侵湖茜紅窗暗春光晚錫簫細趁踏青人那受楊花綰肯道蘇堤路遠萬千
條烟絲醉軟杏花深鎖滿院斜陽雙扉微款踈地珠簾波紋都似春痕澆噙香抱
粉帶詩來竟左尋春伴水上煙蕪細短繞西泠尊香未斷碧陰陰地小立移時鞋
痕苔淺

下書用原句跋云和琴栖女士訪社友姜女士作原詞直逼小山非納蘭頻伽所及

拙詞不敢云和聊識瓣香下書邴蒼謹注梅兒喜極肺葉微微動躍自念邴郎才調真能步武玉田詞中去上調融音節諧婉不圖施劍于豺虎叢中之英雄而性格柔和至此邴郎邴郎麗瓊事汝爲不虛生矣此時女尙未知以扇爲聘物思欲挈之以歸又防仲光不悅但再三諷誦其詞而出

第四十一章

三月己巳勅立政務處于京師凡一切因革損益維新之務咸隸焉于是徐那李三君會于德使館議中華各項進款可指就者以備賠款之需己卯丙國兵隊全數撤回回國南城歸隸丁軍管轄都下紳民至製繖稱曰萬民繖以鼓吹送丙軍識者引與順民之旗同恥也庚辰殷吉馬玉岡各軍開往河北駐紮此時王公大僚合疏請乘輿北歸不報四月丁酉都下紳民復請回鑾得旨俟洋兵盡退卽爲定期庚戌奉勅凡在京王公百僚均賞加半俸丁巳諭以七月十九日啓鑾由河南還京午節旣屆都下官民已漸漸歸時有懸蒲于門者仲光謂梅兒曰夫人歿已數月不如趁蒲

節往停靈之所一祭梅兒感動之容立形于色卽曰三聖庵非遠仲兒能否同妹一行此事勿煩老父仲光敬諾立時趣治祭品命至南下窪甫入庵門大樹葱綠敷陰滿院左廂嚴潔已見靈輻梅兒不及陳饌已伏哭棺次仲光命侍者陳設香蠟祭品注香請梅兒展拜梅兒哭不可仰伏地不起仲光曰妹且起容阿兄拜母也梅兒不期手挽仲光盈盈起立此時似以挾壻同來之心掬示老母仲光亦知其意微握葱纖密示親愛之意夫妻咸相喻于無言祭已仲光曰此去不二里卽陶然亭妹方悲梗能否至彼一開鬱陶梅兒曰是江亭乎地原非勝然在長安塵壒中聞頗幽邃不妨同往一遊仲光卽出戒車扶梅兒踐小橈而登梅兒此時知一身已屬仲光卽亦不復歛避梅兒中坐仲光初擬步隨梅兒曰車沿可坐也乃同上江亭時蘆葭已長車行其中如小艇加篷高級十餘均仲光扶將以上憑闌四顧柳風拂面梅兒日記與老母同來一次乃母病綿綴遊趣消歇計老母生時初不令我沉酣筆墨日課紡紗此仲兒所見者兒家尙有薄田何至與貧女同此生計願以怡悅老母耳老父則

深不謂然。今慈親見背，兒尙憶臨水小籬，與仁慈母氏同轉機軸于溪上草堂。今北來久，不面水，顧茲野鳧潭上聚水一湫，令人心念塘西不已。何時與兄同歸草堂，領彼水懃山容，小供阿兄詞料。仲光曰：妹安知兄之能詞。梅兒絳頰復頰，久乃言曰：扇上所書燭影搖紅，非歟語已微，哂然已稍放其膽，不類前此覲覲矣。仲光亦不欲再竟其詞，防自隳禮檢。卽曰：恐老人久候，可以歸矣。歸時古梅已延候于門外，言曰：侍者歸言爾兄妹同赴陶然亭，梅兒汝尙憶與若母同行乎。恨若母不甚知文，一無雅趣。庵中人爲我照料，停靈如何者。仲光曰：窗戶嚴密，汛掃精潔，古梅無言。于是家人小飲，梅兒亦共杯箸。此時三人心緒皆了了，第無翁堵及夫妻之名詞耳。辛卯閏邸抄云：已派純王赴丁國，已自京首塗。是夜水會鉦聲大鳴，言南海大火，經時未熄。此卽丁國大帥瓦德西所僭居者，火發兵官走避不及，有焚死者。明日仲光始聞，心念中國不振，旅使異國，大酋入居禁籞，禍由誰召。上陽不足逃責矣。

第四十二章

此時紛傳各國洋兵盡數退出京城。仲光偵之果然。於是五城始分遣巡社治街道。時交七月矣。癸卯得西安詔旨。將總理各國事務衙門改爲外務部。班在六部之首。以親王爲領袖。古梅仲光知和議垂成。將作歸計。然天津至塘沽。各國洋兵尙分段以守。行李往來。宵小挾洋人之威。詐索行客。其人皆團匪歸隸洋人者也。梅兒不欲行。于是復止。伯苻夫人忽以人至。言竹葆先生姊氏嫁某甲。而媼其人冒利。儉險。將傾仲苻之家。請仲光趣議弭此凶鋒。仲光匆匆至。而問故。方知寶振甫先生遺一媼妾。日鬪于家。仲苻旣殉。妻不能堪。其擾奴子劉乙。調弄其間。而甲姑又袒此媼妾。與劉密謀。傾仲苻妻。欲分其產。俾媼妾更立門戶。旗人女嫁後。殊有力于其外家。於是劉乙憑其威力。大肆咆哮。迨仲光至。乙尙出而抗辯。仲光曰。乙止汝奴於人家。乃敢與其家事。且汝何力而狂妄如是。乙愈怒。且以仲光文弱。可凌。仲光笑曰。鼠子敢爾。駢二指。按其項。乙立屈膝。自頓於地。仲光曰。後此汝當審慎。姑氏爲爾惑。吾不怨姑氏。然爾當就鞫於京兆。乃就案作牋。與府尹陳君言狀。陳則仲光友也。覆書請卽下。

狀。于是仲光別遣他僕以狀入。陳君收劉乙杖之事得寢。孀妾始月受金。寄食姑氏家以終。于是仲光復爲伯苻子橘徒署狀上之宰相。具伯苻兄弟殉節傳略得旨。贈光祿卿。飭事蹟宣付史館。仲光曰。吾于伯苻之事畢矣。遺詩二冊。當挾而南歸。與鑄龍商定梓行耳。己卯諭停止八股及武舉科。越六日乙酉。命夏育壽一軍赴潼關治蹕路。而丁雁臣一軍仍駐侯韓嶺。聽調遣。八月丁未。各國大張告諭。擴充使館界址。東至海岱門。西至正陽門。北至東單牌樓。立限令百姓鋪戶按期遷讓。仲光曰。嗚呼。令人憶滿洲當日入關圍地時矣。丁巳。東朝官家自西安啓鑾還京。而羣關沿路宣索地方騷然。戊子。宰相李鴻荃薨于京師邸第。而乘輿至河南府矣。

第四十三章

秋風夕起。古梅庭除之柳已慘綠。微動飄零之意。仲光目擊京師巨變。頗怏怏欲南歸。商之古梅。古梅亦曰。昨得子驥書。言秋來大熟。吾亦歸理吾田。于是入問梅兒。梅兒曰。果阿翁與仲兄謀定者。兒亦決行。乃卜日以辛未出都。書籍僅十二簞。篋笥八

以重繇爲裏。裏夫人靈輜自前門鐵路下塘沽。先期至五城。請得路引出城。備沿途交洋兵簽字。仲光歎息以爲非大愆誤國。胡至外人入梗中國之事。顧至此亦無如何。仲光都中故人。但有京兆尹陳君並慧月與伯苻子橘。徒遂一一叙別。辛未遲明。仲光已先至三聖庵。奉徐夫人靈輜至車站。而古梅及梅兒已前在梅兒哭。古梅立止之。勿駭物聽。梅兒仍嗚咽不已。方部置見車前。有虬髯人手一書。呼曰仲兄行乎。仲光驚視則鐵椎王壬也。執手大歡。王曰。此去必面蠲師。幸爲我致此書。吾今將赴陪京。自圖事業。仲光值此世亂。不爲官亦佳事。朝士方備迎鑾。而仲光蕭然南下。天下知機之人。固與憤憤者殊別耳。吾耳目廣。不十年革命之軍。且起而上。陽所爲乖忤人心。去年之亂。誰則肇之。亂肇自上。而禍貽於民。賠款之鉅。天下膏血皆竭。愛新覺羅氏寧能久存。遼瀋多健兒。余當別覓一噉飯之地去矣。仲光默然不知所對。知王壬此去必長。紅鬚則遼邊多事矣。顧亦不作他辭。但謝夜中卻敵之盛意。王壬一笑別去。車隆隆作聲而行。梅兒與仲光憑車窗外。盼田廬草磧。過如箭疾。抵暮至塘。

沾得旅舍地僅咫尺而負荷箱篋之費乃逾百金脚夫之跳踉叫囂狀若噬人仲光謂梅兒曰是皆團匪之變相也已墜畜生道中較無可較舟行二日有半至滬上既登岸就關權乞得提單起棺於舟中實一善地明日趁小舟入杭垂至塘西而子驥已以人延候行篋既上始昇靈輻入厝蕭寺子驥年可三十以外見仲光即呼妹婿古梅以目止之弗悟仍續續而呼仲光忍笑而答此時梅兒亦不之計但匆匆自檢書籍物事四顧景物依然而慈親已化異物顧新歸防老父悲涕亦忍而不發子驥者樸齋人也家具措置已井井而梅兒尤避人爲仲光陳設書室一瓶一硯位置匪不高雅此時仲光知去佳期末遠意亦良適夜燈既上飲於草堂四人同坐元素亦來絮絮問京師事古梅告以愛女已贅仲光並述三河遇難之故元素駭曰吾初謂仲光書生耳不圖英武如是亦歎息盡泯前愆語時梅兒咸在然神宇沉肅如未嘗聞仲光深以爲異子驥下榻別室梅兒仍居徐夫人所居室仲光住當日故居微聞有龍腦香氣則梅兒預焚于鑪中者也自是梅兒日僅三數見而已餘則深匿不出

然茗糗之屬咸恃傭。嫗古梅日與子驥謀嫁女事。子驥遂營營治奩具矣。

第四十四章

仲光歸既二日將入杭臨林太守喪乃便道先至桐鄉時方志初政聲赫然人士咸親若父母高鑄龍乃不居署別賃一園林引河水通入深池別導一溝繞舍而出開窗水風颯然拂面見仲光握手不能語然親密之容如久別而逢骨肉者久久乃曰杭州逝矣彼此涕盈於睫既坐問杭州病況則風溫而挾溼痰暗不能聲沉綿三日始率人士弔祭者如織咸投書請留葬孤山公子以首邱之義夷猶未決請仲光決之仲光曰是何疑以名宦占名勝千載無祧時矣謂杭州與吾輩至放鶴亭徘徊不忍卽下且手補梅花百餘樹於山麓謂死願魂依居士也此語鑄龍當已聞之鑄龍曰不寧惟是前死之數月集虛白堂作詩鐘杭州不期得句云爲我名山留一席看人滄海轉風帆卽此已成詩讖語未竟侍者傳言方侯至則志初去輿蓋徒步而就仲光入門大呼曰仲光大好豔福乃得玉人爲偶吾不能道汝矣當大置酒以燕朋

友因坐述三河遇盜及大鐵椎事鑄龍曰不圖仲光劍術之精乃至此也聞蠲師已退院久恆語其徒問仲光行止且決仲光必歸仲光曰吾且先弔杭州再謁蠲師方丈耳忽聞門外有盤盃相摩聲乃志初已戒行廚就鑄龍家飲仲光座間述團匪之縱火殺人東朝之聽讒戮忠羣奸之欺天蔽日百姓之流離困頓西兵之蹂躪京畿三忠及聯仙杏之慘死伯苻兄弟之殉節語至酒闌未已時聽者顏色悲憤交作頃刻數變鑄龍曰茲事一一皆微聞之顧未如仲光目擊之詳也且仲光亦聞吳竹村死事乎西安之變有周之瑟者武弁也興訛造訕致動亂民謂竹村爲二毛呼嘯不逞闖入署門取竹村過道署而監司包夔不爲理乃亂刃殺于道周公子馳臨父喪亦死于是大殺洋人嬰兒拖腸道上匍匐移時始死漁者至以長篙貫西婦之私達喉而出兇慘逾于野獸西鄰責言將以大兵臨浙當事者始懼悉數取囚連坐至百數杭州旣殞府治遂空新守移篆他處以舊治爲不祥今鞫囚卽在彼間栢楊相屬觀者慘慄其始臬司龍泉轉運施岑均斥東南互保爲謬施欲聚兵二千起事遵岡

煥章矯旨戕教中峯不可而止迨西安詔旨至言外人求排外之人龍施皆在罪人
之列顧施已前死龍至屈膝西醫納金求生至可悲矣今西安之囚已盡戮于湧金
門外周之瑟亦死竹村老母幼子飄零東越至可憫歎于是太息不止明日別志初
與鑄龍同至杭州

第四十五章

林太守生時教子未嘗形諸詞色但談言微中諸子已懼然領受雅量盛德爲時所
無然苟益民生雖去官無憚生平不營私產備極友愛夫人醇懿和厚于太守卒之
第二月亦嬰疾逝二轄同停方備歸葬仲光鑄龍既至臨哭于靈所與公子力爭以
爲必葬西湖言縱歷滄桑而人決不廢置名勝之地沒偉人之名且不祧之局較之
丘隴蕭然歲時一祭爲事大殊諸公子意動鑄龍大悅爲馳告杭州父老子弟
感太守入骨遂議卜葬乃相地放鶴亭後就亂梅中啟壙矣西冷九月風高湖縮水
逾清冷下見葑草鑄龍仰光泛舟容與湖上至錦帶橋坐石闌左望裏湖則陽台山

色青蒼欲滴外湖則小艇歷歷在湖水空明中如小鷗遊泛遂以舟進金沙港向靈
隱時紅葉已間出一瀕山門下視若天地別開高樹參天飛來峯列如蒼屏過壑雷
亭至冷泉亭上萬籟都寂但見經幢高聳倚闌微聞水聲鑄龍追念杭州生時月必
一兩至今風景不殊而感舊乃有人天之別遂相將至韜光庵登高頂全湖如開明
鏡回望錢塘之江一綫蜿蜒而西與烟樹都在空濛薄靄之間仲光恨與觀潮之期
相左鑄龍曰近乃無潮吾客此七年見潮纔三度耳而潮來或在七月昨日聞丁家
菊花絕豔仲光趁未行當往一觀仲光曰丁君非聚文瀾閣之書俾還舊觀者耶鑄
龍曰然顧其人已逝此間魯靈光唯榆園老人榆園盛道仲光之才必一造之老人
家有二鶴甚馴爲人亦弘達工于填詞刻叢書無數引爲老友足資談助仲光諾遂
同下山約以明日訪榆園榆園老人年七十餘矣校刊唐文粹一百卷刻之世稱爲
精槧又刻榆園叢書十餘種于白石詞尤精覈小園臨水自題楹帖曰送酒船來鷗
讓路乞花人去蝶移家每值臘月之晦輒攜錢千緡至小質庫中見持衾被來質者

則授錢。卻其被。令持歸禦寒。他物則否。未死之前。已購斬衰。及緦麻之服。與喪中應用之物。上及棺殮。衣冠咸備。局之一室。告諸子曰。余一撒手。恐若輩紛亂。無措。故余代爾勞也。其作達如是。此皆鑄龍道行。告仲光者。既至野服。出見初。無他語。但曰。仲光盛年。奈何不仕。仲光曰。敬謝先生。荐寵蒼學。識均味。無以自振于世。且留滯都下。三年。戊戌之變。肇自朝廷。庚子之亂。訂于淫蠱。蒼日擊心沮。宦情盡矣。榆園曰。古梅已歸。聞仲光爲古梅快壻。此老殊有選壻之能。聞其愛女詞事。至佳。老夫將來詞選。必當求其珠玉。聞仲光于此道甚精。能否以一二解見示。仲光曰。少時瓣香玉田。不能得其淒清蕭寥之概。患難以來。此事都廢。行當取正于先生。于是行經鶴棚。牡鶴修翎如雪。牝鶴背上微有泥滓。仲光問故。榆園笑曰。牡者好以爪拊其背。故沾泥耳。遂約明日飲于丁家之園。

第四十六章

明日方欲踐榆園之約。而古梅飛書至。趣仲光速歸。遂以書謝榆園。命舟趣塘西。古

梅既見仲光笑曰別無他事以數日不見老人若有所失故趣歸耳問見蠲師否仲光曰方匆匆商林太守葬孤山事未及謁古梅曰汝婚禮去此僅六日余一從儉樸薄田二十頃分十頃爲嫁資餘十頃則留以賜嗣子仲光無言不敢鳴謝卽入室以書告母曰

阿娘膝下男留京三載不圖兩觀時變庚子之禍胎于戊戌放棄正人誅戮善類戾氣所蘊遂成大亂團匪毫無知識其術遠不如徐鴻儒而臨淮諸王下逮岡于崇信膜拜用此蠱惑東朝官家固知其非然刳于端王無敢斥論竹園仙杏諸先生乃以次刑于東市寃抑之獄與六君子無別也古來淫濫之刑豈必慘如闖獻桀時龍逢紂時比干至今懸在人口彼桀紂之所濫殺者詎此二忠惟二忠爲萬不宜殺之人而桀紂殺之此桀紂之名所以千古也今前之所殺者六君子後之繼死者四君子一一又皆男所目擊則長白之王氣恐自是燿矣修伯苻兄弟死狀尤慘二妹從難而婢子龍兒亦舐藥之餘瀝淮王雞犬同日升仙或亦忠義之

氣所感。男數至。伯苻故宅庭樹依然。而二妙不見。愴喟之情。殊非筆墨所能罄。老母望兒在學問。不在富貴。今男不惟不得富貴。而且淪失其學問。深恨不肖。無以告母也。古梅先生愛女已允。男爲配方避亂。三河道遇餘匪。可三十餘衆。男出劍與格。媳婦自車中囑男勿傷生命。幸三接兇鋒。但斷渠魁之指。大敗而去。不戮一人。亦云幸矣。三河僻處。畿輔以外。餘賊方謀夜襲吾家。有同師之王老鐵先期見告。俾男爲備。乃夜中聞有巨鐵觸刃之聲。似大戰于短籬之外。已而無聲。明日視之。遺刀地上。或賊所棄擲者也。必老鐵夜來見救。亦幸不殺人。吾家世忠厚。不欲爲兇事。重貽老親之憂。茲已安抵塘西。古梅先生將定于本月二十四日成禮。禮成以後。再圖祇率子婦南歸。廟見並侍老母。晨昏岳氏尙望其女來往浙閩之間。盡其餘年。然後已也。大哥今年茶市想或得利。季弟宿疾幸瘳。此祖德所蔭。亦老母仁愛感召天心耳。男蒼跪上。

書已笑曰。此書可爲吾自閩抵京文字之大結。束恨匆匆。未言杭州及鑄龍事。然尙

可續書也。忽引目見老嫗裝滿白菊一碧瓷巨瓶中。間以一雙綠菊攢三聚五望之。如憚南田所寫折枝知蠶嫗決無此等胸次。問之果梅兒所命也。飯時始見梅兒從容如平日。仲光遂語杭州夫婦同瘞孤山事。梅兒太息曰：廉吏固可爲也。

第四十七章

塘西江上小堂初不寬廣。古梅亦不懸絳綵。及諸陳設。但書邴氏祖先之牌。供于小堂之上。左懸王蓬心所摹趙希遠萬松金關圖。右懸王清暉梅花書屋圖。蓋仿郭河陽者。左右則夾以高鑄龍金泥之賀聯。爲方志初所書。志初亦書催粧詩。作一立軸。陳設閒雅。遲明具香蠟。梅兒盛服茜裙。不具冠帔。行禮既訖。先拜邴氏先靈。遂及劉氏。然後古梅坐而受禮。夫婦同入洞房。此時賀客元素以外。亦僅數人。均子驥款入別室。此時仲光真個銷魂矣。夜中客散。梅兒卸妝。仲光拱揖歸座。老嫗陳杯罌一雙于几。梅兒無語。仲光曰：當時舟過水次。聞紡車聲琴竊。亦不料舟中人乃爲今夕執杯相屬者也。人事萬變。乃于離離奇奇中。遂蒼心願。自今以後。但有林泉之樂。佐此。

雙栖梅兒不期微笑曰百無所難唯仲光對王老鐵在草堂坐語時公然承作山妻
聲吐洪巨獨未料帷中人聞之難堪耶且問當時詞扇何由竟落君手仲光笑曰行
踪近盜不敢奉欺蓋自書叢中取得蒼之顛倒此詞幾不御饗飧而飽梅兒曰仲光
和詞麗瓊亦竊觀之愛極幾欲抽取而出又妨仲光弗舍吾已早料仲光戀戀此扇
不去左右當時固已微觀老父之意迨鑄龍書至時吾夙已了了矣至此避無可避
因亦聽之仲光曰方吾岳母就殮時琴栖暈不省人亦曾憶何人抱提救護者耶梅
兒愕然曰然則吾已迴身就抱矣何以曾不一覺一時痛絕遂至于此當時若微有
知覺者寧死安敢就君懷袖仲光笑曰今尙何言矣梅兒此時尙再三思索暈時態
度雙頰不解大赧

第四十八章

明日侵曉梅兒已起而古梅子驥已坐語小堂處置家事仲光出見子驥起賀後復
與古梅言田事仲光自赴書屋見菊花嫣然較昨日尤媚此時心中如酒困纔蘇思

夜來事一一若記若忘都在解醒時圖度其味醞醞然因計人生何名得意詎高車駟馬廣廈深堂粉白黛綠者滿前侈然自足耶情鍾一人則膠結處方浹入肺腑彼廣田自荒理無遍及羊車望幸之心寧無念及他人又何必作此隔膜之纏綿且知天下已亂決無知己之人卽得一官亦無可施展幸老母強健恩意至深兄賢弟順家有餘資此外尙有何求暇當著書自遣而梅兒亦淹貫足佐己之所不及且江南山水儘足遊娛天心之契已厚矣方凝思間梅兒已盈盈立于案次仲光延坐見梅兒髮光如漆不事脂鉛而櫻唇之絳卽善畫者亦不能點染仲光曰今日可以容仲光平視矣菊花大好惠我尙未鳴謝梅兒笑曰西人有蜜月之游吾不解所謂蜜耶密耶言蜜則于義甚洽言密轉滯仲光爲我釋之仲光曰吾亦從蜜我家旣不拘俗擬明日與爾同赴雲栖一遊梅兒曰老父能否同行仲光曰前此未經成禮則動息必引老人今茲二人一耳旣無拘檢何須監史臨之梅兒失笑遂同面老人老人曰雲栖吾已至五十餘度矣爾二人恣往吾不汝與乃卜日以後日行先至西湖小住

時已秋深柳條多半焦黃顧焦者柳也而二人心中春意方正萌芽大凡悲秋之士必心有所悲觸以物狀方生愴喟若仲光夫婦脫自豺虎之叢新署鴛鴦之牒仲光左橫寶劍右挈嬌妻從容山水之間解釋簪紳之縛人間豔福獨占無雙雖歐陽子百篇秋聲之賦讀之亦未嘗動色矣夫婦同行過行宮至樓外樓下仲光曰此吾媒氏之樓也因述當日奉還遺金始得識老人于此千迴百折始成今日因緣梅兒曰仲光自謂此一篇文章曲也我則尙以爲直彼小說家言才士美人離合之狀中間必有讒搆之人或見切于有力或不遂于所親至于顛頓流離始諧燕好然已筋疲力盡尙何意趣之足言今仲光之于麗瓊不過少有挫折在三河遇難之一著此亦文勢之不能不曲處謂之爲曲真誣我也仲光笑曰吾鄉有凌蔚廬者老矣其人譚英法小說至八十一種多險急之筆書中所述亦多顛頓流離之狀正如琴栖之言讀之令人意索悵吾二人之事不令蔚廬知之其人好諧謔將點染二人踪跡成一小說亦大佳事梅兒曰不惟小說戊戌庚子之局足資史料何妨卽以吾二人爲之

緯也。于是相將及竹素園。至當日古梅遺金處。陳迹如故。匆匆三年。是夕歸宿于湧金門內逆旅中。戒肩輿以明日遊雲栖。

第四十九章

雲栖路須沿海塘而行。過六和塔下。塔高插天。錢塘江色映上肩輿。轉過梵村。已見雲栖碑碣。沿路竹陰交織。萬綠不見漏天。肩輿近放生池。卽下池水。冷碧有細泉。潏然下于池中。如鳴琴。筑北望細路。宛宛轉入竹陰。夫婦徐行入竹。竹中忽見數高杉。上接雲表。竹身旣高。萬葉交互。覺此危杉。但見其幹。不見其末。宏師之塔卽在竹間。壁上刻宏師詩。言聞試院發榜。砲聲心亦爲動。梅兒笑曰。仲光言高隱。果聞此聲。亦爲動否。仲光曰。蓮池行高。故動若蒼者。蠢蠢然不審科名之可貴。或不動也。左轉至寺。寺僧治素饌甚佳。夫婦同御食。旣投以十二金。遂匆匆出寺。僧送于門外。仲光忽沉吟不進。梅兒問狀。仲光曰。昔與吳竹村同遊。今竹村全家殉難矣。重遊至此。心念故人不已。語後下山歸時。已日晡。方御夕飧。林太守四公子咸辰請至其家。言夫人

及妹氏咸願見邴夫人梅兒許諾期以明日乃命輿同至林家兄弟已以盛席相款云將以冬節後奉太守窆于孤山明日梅兒同林家娣姒及妹遊湖仲光遂至吳山茶樓望錢塘江霽色至佳了了見吳興樹木其短如薺暮歸逆旅梅兒歸亦未久盛言林家娣姒敦睦仲光曰琴栖乃未見鑄龍妻妾也不惟敦睦而且彼此友愛如骨肉鑄龍家有名父名母爲之訓迪而陶鎔宜其婉嫕如是也明日命輿至祖塔院面蠲師蠲師見仲光大悅言曰都下事老僧已盡悉唯仲光已娶從此墜入情網不復出矣聞將南行衲意且留至臘底吾亦將西歸矣仲光大愕師曰僧臘已高寧能久留於此仲光尙有朋友窵窵之事約在仲冬旣送良友復送老僧不寧佳耶仲光淒然不能答蠲師笑曰此正仲光所以網于情中不復出也今且去臘底更來仲光遂上王王書膜拜出蠲師送之丈室之外仲光沿路徘徊覺一槐一竹咸有蠲師深情在內歸語梅兒言蠲師一一前知至不能置喙一述已事遂決計明日歸塘西轉瞬十月梅信已近仲光因憶當日超山之遊良緣遂締于此而老母思見新婦時以書

來仲光以蠲師之囑且將送林公之殯遂報老母以明春歸也

第五十章

孤山梅花補者甚衆然隨補隨枯遊人既多人折一枝往往凋悴太守生時補至百餘株多半俱在林祠左右石闌以外臨水者遊人攀折不及尙覺橫斜一近小青墓前則不如水隈繁盛矣太守墓居林墓之左間以放鶴之亭治墓之工杭人爭爲效力爲工非多然規模甚宏壯墓前立華表用誌遺愛葬期既屆學堂諸生皆馳柬請罷學以送太守仲光夫婦具舟至桐鄉約鑄龍同行以梅兒未謁鑄龍夫人欲一瞻風範蕩舟破曉而行風高霜嚴梅兒以紅錦狐腋爲斗篷端坐舟中仲光常服坐對旣入桐鄉水浸城陰枯柳垂橋橋外粉牆半折卽鑄龍家村野風物斗著一美人著腥紅之服觀者疑展圖畫時鑄龍已赴志初官舍鑄龍夫人出面亦驚梅兒之美彼此爲禮旣竟鑄龍姬人旋亦出見以仲光鑄龍交誼故兩家茂密逾于親戚夫人氏留系出故家端重慈祥不苟言笑膝下一子一女女曰鍾霞聰慧能文聞梅兒淹博

亦依依不去左右。仲光徑造志初官舍，訪鑄龍，並訪志初。志初一見，卽曰：「林杭州葬事，吾固謂仲光之必至也。」杭州葬事，非仲光力決，當不遂。此美舉。聞夫人亦同來。荆人已赴鑄龍家相見矣。今夕月上，當與仲光一遊。鴛湖卽以待者，延金揆伯置酒小亭之上。酒半月來，志初趣飯。四人同出官齋，牆外通河，舟停其下。遂容與出水關，已望見鴛湖樓角，枯柳在烟月中，尙時時搖曳。仲光心感世亂，值此清涼之境，頗無歡意。忽長歌玉田之八聲甘州音調，悽婉水禽聞聲，拍拍而起，飛入殘蘆而去。遂舍舟至烟雨樓，寺僧以令君至爭具茗以候。月中金君問都門事，仲光語之歷歷。彼此太息。志初曰：「龍氏心持兩端，漏網不誅，後且致亂。」仲光曰：「龍氏沈湎冒色，去死已近。然某王旣愚而貪視邊事爲兒戲，此人旦夕將主樞，近納賄酷于龍氏宮掖之中，有同水火。巨鎗崔貴勢燄盛於李鎗，內外交訂，求國之不亡，恐無是幸事也。是夜清游無權，五鼓始蕩舟入城。」

第五十一章

梅兒爲留夫人力挽。乃不至杭州。行者方志初。高鑄龍及仲光耳。行李徑趨西湖。以水月樓大湖船爲泛宅。買湖上魚蝦治饌。吳山月上。滿湖皆迷漫。作烟氣。實則非烟。水氣升耳。湖闈無燈。隱隱見幽火。三四星。則刹竿上禪燈耳。夜中幽寂。不類人境。然仲光尙欲岸行。遂挽鑄龍志初。繞錢王祠而過。向裏六橋高樹。結陰上不通。月但時時篩碎光。粗辨路徑。不至陷入蓮沼而已。水風旣緊。鑄龍性不耐寒。遂半道折歸。志初亦疲。仲光乃與俱歸。明日太守葬期至矣。湖上小舟如蟻。多半學生。而孤山轉無冠蓋。以太守清體。大府畏其廉貞。同官復多媚嫉。咸曰。此爲紳民私葬。太守非朝廷意也。竟裹足無一至者。仲光笑曰。太守風節。貴在民心之歸附。此蠅蛆之同列。至亦不爲太守之榮聽之可也。是日微雪。送者已預集。可四百餘人。已而太守靈輿至。夫人繼之。仲光志初鑄龍皆哭。下窆以後。衆皆興辭。公子稽顙謝會葬。時東洋博士亦至。爲禮可云盛矣。自是以後。每年四月太守生辰。學堂皆予假。爲杭人之佳節。至光復以後。湘陰左公之祠。與洪楊之役。之有功者。皆撤而杭州祠墓。巋然獨存。正以洪

流波靡之中獨倡新學食報之厚亦近代循吏所稀矣

第五十二章

仲光梅兒既歸塘西仲光曰蠲師之言殆將示寂期在臘底去此尙有月餘開春擬與琴栖歸閩見老母矣梅兒曰吾姑盛德聞仲光所述屢矣自慈親見背麗瓊行坐皆思今以姑爲母固有依戀之人唯老父六旬嗣兄未娶吾二人迢迢南去留此白髮老親出鮮琴酒之權入無定省之人仲光試爲麗瓊設想將何以爲情耶語次泫然仲光亦爲悽梗因曰吾兄弟三人聞季弟亦娶經年矣獨吾在外既已不事功名直可著書自遣且吾尤愛浙西山水當可往來閩浙之間老母仁愛愛子必及其子婦果天相吾二人者子慶椿榮我占萱茂一水之遙半年居浙半年居閩則彼此兩遂矣梅兒悅遂以仲光之言告諸古梅古梅曰吾田在此故居塘西今子驥旣爲能吾治田吾但計其秋收而已近已買得西湖廢地一區近裏六橋下地廣可三十畝可以少蓋茅茨仲光試爲我作圖仲光夫婦南歸後吾意卽召匠徒興作明年夏中

工竣則柴扉臨水蓮芡已繁卽爲山妻卜葬于別墅之後其右卽爲老人生壙矣仲光悅卽爲屬稿近水不施牆籬作廣軒寬可四丈以外窗扉外展臨窗已見荷花地既不廣則以密竹彎環作徑爲曲折竹中翼以朱闌闌盡作廣廈右轉爲階級直上危樓樓之四圍抱以密柳迎面卽見雷峯之塔下矚見三潭印月處左轉則爲高廊構榭五楹其後爲廚馥以牆隔之屋後有白楊五六株補以檜樹則老人壽域在焉圖成古梅曰此間宜稍補梅花仲光笑曰終是老人高識如此園林梅花又安可闕耶於是石筍離立處補梅三五株圖成入示梅兒梅兒方清檢書篋得伯苻詩稿數卷卽曰仲光允爲修光祿刊此稿將以何時付諸剞劂仲光笑曰伯苻之名旣在史冊遺集之傳與不傳非所計也平時頗有倡酬之作然全豹乃尙未窺請于夜中快讀一過

第五十三章

臘雪已降窗外梅花盛開古梅命酒呼仲光曰仲堦明春歸矣吾園命名曰梅光別

墅。仲光曰：意之所寓，卽爲佳名。于是家人聚飲。子驥亦頗能酒。仲光曰：子驥聞已定聘，婚期當在何時？子驥曰：吾意待仲光及琴妹來時，再圖成禮。今茲方構別墅，吾當侍阿父同至杭州耳。古梅忽謂梅兒曰：汝于開春卽行，凡應需者可自料量。吾有龍眠長卷，卽爲汝嫁資。爾可將歸，外有珊瑚珠如意一枝，可獻爲若姑之壽。梅兒曰：仲壻家有藏書，女所常讀者，可以留諸別墅，行篋無多。咄嗟卽整。仲壻不日將赴祖塔院，送蠲師計行期，尙去此半月耳。時爲臘月十五日，仲光遂別梅兒，匆匆赴杭州。卸裝卽至湖上茶肆，中西嚮一人背仲光坐，意態至稔，則繞座趣視之，呂翰也。仲光赫然問何以至此。呂翰曰：履師已示寂，吾送之入塔。履師遺言：蠲師亦且坐化，靈可至浙，覓取仲光，必親面蠲師，師藝高于己十倍。汝當聆其口訣，示老衲，不偏於仲光也。仲光曰：墨卿近來劍術較前如何？呂翰則盡出其所學，示仲光。仲光知呂翰功候淺也，因微示以蠲師口訣。呂翰大悟，遂移行李與仲光同寓。時爲臘月十八日，二人沐浴更衣，購名香，步至祖塔院寺中，僧衆皇皇似有所待。見仲光至，爭曰：師待居士經

時矣。仲光先入。留呂翰於丈室之外。獨師已披袈裟坐禪牀。仲光入。卽膜拜。獨師曰。爾之同伴胡不聽。入仲光。聽曰。弟子此來。卽爲呂生翰先容。師曰。知之。呂生入。呂翰大驚。卽蹠諸仲光之後。師曰。老衲劍譜已付仲光。仲光後居士學劍術。乃出居士之上。仲光爾歸。可以口訣授翰也。飭侍者鳴鐘。衲將登座矣。於是寺衆大集。二侍者一捧杖。一捧香爐。獨師徐步出。上高座。弟子以次參訖。仲光呂翰亦居諸學者之後。獨師言曰。昔者一祖迦葉入鷄足山。山合待阿難至。山復爲開阿闍世王。將以香薪茶毗。阿難不可。謂大迦葉。方以禪定持身。俟慈氏下生。乃般涅槃。衲無迦葉定力。深以茶毗爲是。迨阿難示寂。則踊身虛空。現十八變。入風輪。奮迅三昧。而分身四分。一分惠忉利天。一分惠娑竭羅龍宮。一分惠阿闍世王。一分惠毗舍離王。各寶塔而供養之。今老衲自視形非我形。塔亦非塔。供養尤屬形相。大衆聽者。若識本心。卽本解脫。若得解脫。卽是般若三昧。般若三昧。卽是無念。言已。合十於胸。圓寂矣。衆皆鳴鐘鼓持咒。一一羅拜。仲光私謂呂翰曰。適師所言。述六祖之言也。師旣入塔。明日爲茶毗吉期。衆奉塔至場。上上座。容公舉火。火發時。旃檀之香四射。晴日當空。舍利如雨。

畏廬瑣記

閩縣林紓著 一冊定價四角

是書係林琴南先生所著先生
著作等身是書就平素見聞之
事擇其有興趣者共計二百數
十則其中所有僻典奇字則必
引經據典詳為證明可以啓發
讀者知識不少不獨可為茶餘
酒後之消閒品也

商務印書館發行

中華民國十三年八月初版

品(京華碧血錄一冊)

(每冊定價大洋叁角伍分)

(外埠酌加運費匯費)

著者 閩侯林紓

發行者 商務印書館

印刷所 上海北河南路北首寶山路
商務印書館

總發行所 上海棋盤街中市
商務印書館

分售處 商務印書館分館

北京 天津 保定 奉天 吉林 龍江
濟南 太原 開封 鄭州 西安 南京
杭州 蘭谿 安慶 蕪湖 南昌 漢口
長沙 常德 衡州 成都 重慶 瀘縣
福州 廣州 潮州 香港 梧州 雲南
貴陽 張家口 新嘉坡

此書有著作權翻印必究

國家圖書館



000797643



.44

-3

籍